

國藥詮證

卷四



國藥詮證 全書四冊

實價每部三元

著者 寶山王劍賓

發行者 王劍賓診所

上海西愛咸斯路七一二號

上海海寧路咸寧里十一號

總經售 萬葉書店

版權所有 不准翻印

國藥詮證卷四

寶山王劍賓著

大黃

性味 苦寒無毒

效用 主下瘀血血閉寒熱破癥瘕積聚留飲宿食蕩滌腸胃推陳致新通利水穀調中化食安和五藏

說明 大黃性味苦寒。本經主治下瘀血血閉。以苦寒之藥下瘀血血閉。可知其因濕熱蘊結而生瘀血。有瘀血而致血閉也。故燥濕清熱可以下瘀血而通血閉。濕積於內則氣滯血阻而發為寒熱。凡統治寒熱者皆為濕藥。因濕已化熱。故以清熱燥濕主治。濕阻而血積則為癥瘕積聚。既有癥瘕積聚。則飲水不化而有留飲。進食不消而有宿食。既有宿食留飲。則腸胃失其運化。

之力。水穀停滯而五藏不安矣。故清熱燥濕可以行血利氣。除寒熱癥瘕。化流飲消宿食。蕩滌腸胃。使推陳致新。通利水穀。調中化食。安和五藏。是以大黃爲清熱燥濕之藥。有下瘀破血之效。無濕熱者不可用大黃。更不能以本經有蕩滌腸胃之說而用以致瀉。蓋寒滯者因大黃性寒而不可用。濕阻而未化熱者。亦以寒能助濕而不可用。如用以清熱下瘀。則中病而可以奏效。若用以蕩滌腸胃。則非協芒硝不行。用以攻下瘀血。非協桃仁無效。因有食積及瘀血者。不一定有濕熱也。本經之意。首尾貫通。若斷章取義。則有誤也。

○大黃黃連瀉心湯 治心下痞按之濡其脉關上浮者

大黃 黃連

○大陷胸湯 治結胸

大黃 芒硝 甘遂

○大承氣湯 治陽明病外欲解大便已鞭者

大黃 厚樸 枳實 芒硝

第一方以大黃黃連清熱燥濕。心下有水濕積滯則痞。按之濡。尙未堅實也。脉關上浮。有熱也。故以清熱燥濕主治。熱退而濕化。則氣行而痞去矣。第二方以大黃清熱燥濕。芒硝蕩積滌滯。甘遂利水。此爲熱結挾濕之證。故以清熱燥濕爲主。而以蕩積利水爲佐。第三方以大黃清熱燥濕。厚樸燥濕。枳實破氣。芒硝蕩積。此方爲外欲解而大便已鞭者設也。攻之可以熱退而身安。傷寒論對於攻下。極爲審慎。故於主用本方時。一則曰大便已鞭。再則曰不鞭者不與之。又曰有燥屎乃可攻之。更曰初頭鞭。後必溏。不可攻之。復恐誤攻之故。先少與小承氣湯。湯入腹中轉矢氣者。知有燥屎。然後攻之。可見攻下之須極端審慎也。

半夏

性味 辛平有毒

效用 主傷寒寒熱心下堅胸脹效逆頭眩咽喉腫痛腸鳴下氣止汗

說明 半夏性味辛平。本經主治傷寒寒熱。以辛能散寒而逐濕也。寒濕阻滯則氣不和而心下堅。辛能散寒化濕。故可以治心下堅。胸中有積濕則胸脹效逆。肝爲濕阻則氣不和而頭眩。咽喉爲濕阻則腫痛。腸中有濕則腸鳴。辛能化寒而散濕。故可以治心下堅。胸脹。效逆。頭眩。咽痛。腸鳴。散寒逐濕可以利氣。故能下氣。濕盛則汗腺失其收縮之力而汗不止。故散濕可以止汗。凡因濕盛痰多而或咳或嘔者。用以散濕。有止咳止嘔之效。元素和胃氣。燥脾濕。治痰厥頭痛。消腫散結。震亨治眉稜骨痛。好古補肝風虛。時珍除腹脹。目不得瞑。半夏辛而不烈。爲治氣之藥。氣中挾濕。散之有效。或以滑而能潤。鮮者滑。乾者不滑。所謂潤燥者。因濕阻氣不化則燥。故散濕可以化氣而潤燥。

○半夏散 治少陰病咽中痛

半夏 桂枝 甘草

○甘遂半夏湯 治利有留飲而心下堅滿

甘遂 半夏 芍藥 甘草

○小半夏湯 治嘔而不渴心下有支飲

半夏 生薑

第一方以半夏散濕。桂枝行氣散濕。甘草洩熱解毒。咽痛而以辛散爲治者。以濕阻而氣不宣化也。故咽喉乾燥而痛。辛溫可以散寒逐濕。使運化回復。則喉潤而不痛矣。成註傷寒論謂甘草炙。炙則性緩。本方之旨在散。生甘草有散邪解毒之效。故不應炙也。第二方以甘遂逐水。半夏散濕。芍藥燥濕。甘草散結。有積水則利。故本方在消積水而並不治利。積水既消。利可自止也。甘遂爲逐水之猛藥。半夏散濕利氣。芍藥燥濕利氣。均可助之逐水。甘草與甘遂相反。在本方中可相激而發生利水之效也。第三方以半夏散濕。生薑



散寒。嘔而水渴當竭。以不渴。故知有支飲也。支飲之所以停留。由於濕阻氣滯而失其運化之力。故辛以散濕。溫以散寒。使寒濕自化。則支飲得消矣。

### 連翹

性味 苦平無毒

效用 主寒熱鼠瘻瘰癧腫惡瘡癭瘤結熱蠱毒

說明 連翹性味苦平。本經主治寒熱鼠瘻瘰癧腫惡瘡。此種寒熱。並非普

通之寒熱。係濕化爲熱。血化爲毒而釀成之寒熱。故外發而爲鼠瘻瘰癧癰

腫惡瘡癭瘤。苦能燥濕。濕去則熱退。而鼠瘻等證。可以獲愈。結熱爲濕毒。結

聚而化熱。故燥濕可以退熱。以兼能殺蟲。故能治蠱毒。李杲曰。十二經瘡藥

中不可無此。好古治瘡瘍癭癭結核有神。足見前人皆用以治濕毒。自李時

珍創兼治手足少陽手陽明三經氣分熱之說。遂誤作清熱之用。乃以燥而

用者自用。連翹盛行而苓連反爲人所屏棄。此種轉變爲害之大。良匪淺鮮。蓋連翹實爲治濕已化毒之專藥。不能治其他熱病。苟一讀本經。當知余言爲不謬也。

○大連翹湯 治小兒濕毒利小便

連翹 瞿麥 車前 木通 滑石 當歸 赤芍 防風 荊芥

紫胡 蟬蛻 黃芩 山梔 甘草

○連翹散 治項上惡核焮腫

連翹 射干 獨活 升麻 木香 沉香 木通 桑寄生

大黃 丁香

第一方以連翹治濕毒。瞿麥車前滑石木通利小便。當歸行氣散濕。赤芍瀉血毒。防風荊芥柴胡蟬蛻散風熱。黃芩山梔清熱。甘草解毒。濕阻氣滯。小便

不利而濕已化毒。故利水以通小便。散濕以解濕毒。驅風以行氣。清熱以制濕。第二方以連翹治濕毒。獨活升麻散風熱。木香沉香丁香射干散結氣。木通利水。桑寄生去風濕。大黃清熱解毒。惡核焮腫。係積濕化毒所致。氣血俱病。故清血解毒。驅風利氣。以通氣阻而清血熱。使已結之毒得以疏散。兩方所用連翹。確合本經主治。用連翹者。當以此爲法也。

## 桔梗

性味 辛微溫有小毒

效用 主胸脇痛如刀刺。腹滿腸鳴。幽幽驚恐悸氣。

說明 桔梗性味辛溫。本經主治胸脇痛如刀刺。以其能散濕而利氣也。腹滿腸鳴。幽幽爲濕阻氣滯所致。故以散濕利氣爲治。濕阻而化熱則驚。氣滯則悸。故散濕利氣可以治驚恐悸氣。桔梗之效。全在散寒化濕。凡濕之陰發者。

或不紅不腫。或腫而不紅。雖已化毒而並無熱象。雖屬濕阻。因水氣不化而外。表則燥。燥之可以化熱而助毒。清之可以益寒而助濕。惟有散以辛溫。可使寒去而濕化。故以桔梗散陰化之濕。最爲有效。若有風熱。誤以桔梗散之。則頭痛經月不愈。故昔人有桔梗性升之說。其實桔梗爲溫散寒濕之藥。因力量微薄。不能用以治氣病或風病。元素所謂利竅除肺部風熱。實係濕阻化熱之證。故用辛溫散濕。可以利竅而洩熱也。諸家未能詳究性味。把握本經。故議論甚多而均難中肯也。

○桔梗湯 治少陰病咽痛

桔梗 甘草

○白散 治寒實結胸

桔梗 巴豆 貝母

○桔梗湯 治咽腫微痛聲破

桔梗 麻黃 甘草 黃芩 殭蠶 馬勃 桂枝 歸身

第一方以桔梗散濕逐寒。甘草解毒。少陰病咽痛。以喉中寒濕積滯而化毒也。故散濕逐寒。則可以消腫而止痛。腫則有毒。故佐以解毒之藥也。第二方以桔梗散濕逐寒。巴豆通閉。貝母開鬱。因寒結。故以溫散主治。巴豆辛熱破結。用治寒實。貝母辛平。用以散濕。此方力大效宏。不可忽視。第三方以桔梗散濕逐寒。麻黃燥濕散寒。甘草解毒。黃芩燥濕清熱。殭蠶散濕。馬勃散血解毒。桂枝行氣散濕。歸身行氣活血。咽腫微痛。寒濕化毒所致也。故以散濕逐寒主治。桔梗殭蠶治陰濕。均有特效。宜注意之。

### 白頭翁

性味 苦溫無毒

效用 主溫瘧狂揚寒熱癥瘕積聚瀉氣逐血止腹痛療金瘡

說明 白頭翁性味苦溫。本經主治溫瘧狂揚。以寒濕化熱則發爲溫瘧。熱極則狂。故燥濕散寒可以治之。濕阻則發爲寒熱。濕阻而血滯則爲癥瘕積聚。蘊濕流注於頸項而化毒。則爲癭氣。故燥濕散寒可以治寒熱。除癥瘕消積聚。化癭氣。濕阻則氣滯而血結。故燥濕可以利氣而逐血。氣阻則腹痛。故燥濕可以利氣而止痛。金瘡爲濕所阻則難愈。故燥濕可以療金瘡。諸家以其能治熱利而謂其苦寒。余據本經苦溫之說。用治寒痢亦頗有效。可知白頭翁之治利。其效在燥而不在溫或寒。凡利則腸必挾濕而失其收縮之力。故不問寒熱。凡濕重皆當用燥濕收濕之藥。白頭翁以燥腸濕見長。故爲治利之要藥。寒者可與溫藥同用。熱者可與清藥同用。凡溫性藥之可以兩用者。不乏其例。明乎此則可以免寒溫之惑矣。

○白頭翁湯 治熱利下重

白頭翁 黃連 黃柏 秦皮

○治中結腸丸 治斷冷滯下赤白青色如魚腦脫肛出積日腹痛經時

不斷

赤石脂 吳茱萸 乾薑 附子 當歸 厚樸 白朮 木蘭皮

白頭翁 黃連 黃柏 石榴皮

第一方以白頭翁燥濕散寒。黃連黃柏秦皮清熱燥濕。濕化爲熱而利。溫燥以治未化之濕。清燥治已化之濕。此濕病之所以溫清並用也。第二方以赤石脂石榴皮收瀉。吳茱萸乾薑附子散寒。厚樸白頭翁燥濕散寒。木蘭皮黃連黃柏清熱燥濕。白朮利濕。當歸行氣散濕。本方所治。雖曰冷利。依然寒熱夾雜。故寒溫並用。下赤白青色如魚腦者。係消化後腸中不能吸收而回出者也。故燥濕之外。佐以收瀉。使回復腸之吸收力也。

甘遂

性味 苦寒有毒

效用 主大腹疝瘕腹滿面目浮腫留飲宿食破癥堅積聚利水穀道

說明 甘遂性味苦寒。本經主治大腹疝瘕。腹滿。面目浮腫。因濕阻而水積。故以燥濕利水主治。濕盛則水不化而有留飲。食不消而有宿食。氣阻血滯而結爲癥堅積聚。故燥濕清熱可以治留飲。消宿食而破癥堅積聚。癥堅破而積聚散。則水穀道自利矣。甘遂爲除痰逐水之專藥。其性偏激。取效極速。用之不當。流弊亦多。非有積痰積水。不可輕用。以峻銳之氣。直達病所。中病則佳。過度足以傷氣。氣虛而不能化水。必續有所積也。故須確有把握。審慎用之。以期有利而無害。

○十棗湯 治懸飲內痛脅下有水氣脉弦數

芫花 甘遂 大戟 大棗

○神祐丸 治陽水腫脹大小便秘



芫花 甘遂 大戟 大棗 大黃 輕粉 黑牽牛

○控涎丹 治脅下痰積作痛

甘遂 大戟 白芥子

第一方以芫花甘遂大戟逐水。大棗和脾氣。懸飲內痛而脉弦數。已化熱也。故可攻之。本方用大棗十枚。故以十棗名其湯。十棗之用。全在引諸藥入脾。以促起其消水之力。否則利水不盡。而懸飲不消。脉絃數。積水已化熱也。故以苦寒主治。第二方以芫花甘遂大戟利水消腫。大黃輕粉清熱利大腸。以通大便。黑牽牛瀉腎濕通小便。大棗引諸藥入脾利水。本方治陽水腫脹。係濕盛而熱結也。不但水腫而大小便俱祕。故利水之外。更清腸腎之濕。使濕去而通大小便也。第三方以甘遂大戟利水。白芥子散濕利痰。脅下不但痰積。且有流飲。故以化痰逐水主治。

性味 苦温有大毒

效用 主心痛寒熱結氣積聚伏梁傷筋痿拘緩利水道

說明 天南星性味苦温。本經主治心痛寒熱結氣積聚伏梁。濕阻而氣滯則心痛。濕滯爲寒。濕化爲熱。濕阻則氣結而有積聚。飲食不化則爲伏梁。梁與梁通。言有積食也。故苦以燥濕。温以散寒。可以治心痛而愈寒熱。散結氣積聚而化伏梁。濕阻則氣滯而傷筋。氣阻而寒滯則成痿。筋爲濕阻而失其張弛作用則或拘或緩。故燥濕散寒可以療傷筋起痿而治拘緩。因濕阻寒滯而水道不利。故燥濕散寒可以利水道。或以天南星爲風藥。因燥濕散寒可收驅風利氣之效也。其治痰病。因寒濕阻滯所致。故燥濕散寒可以除痰而利氣也。

○易簡三生飲 治卒中及痰厥等證

天南星 川烏 生附子 木香

○星薑湯 治風痰

南星 老薑

○星半丸 治濕痰

南星 半夏 蛤蚧

第一方以天南星燥濕散寒。川烏生附子驅風逐濕。木香散濕利氣。本方所治之痰厥。係寒濕阻滯而痰多氣閉。與血管破裂之卒中完全不同。故以散寒逐濕爲治。寒去而濕散則氣阻自通。木香以散氣中之濕。有利竅開閉之效。在本方中至爲重要。第二方以天南星燥濕散寒。老薑散結利氣。以氣中挾濕而痰多氣滯。故以燥濕逐寒散結利氣爲治也。藥雖二味。自成組織。第三方以南星燥濕散寒。半夏散濕利氣。蛤蚧制血利氣。本方所治爲濕痰。濕寒則滯而不化。痰乃益多。故用辛溫散寒逐濕。而佐之以燥。蛤蚧能制血利氣。故昔人謂其可通肺腎之氣也。

# 大戟

性味 苦寒有小毒

效用 主蠱毒十二水腹滿急痛積聚中風皮膚疼痛吐逆

說明 大戟性味苦寒。本經主治蠱毒十二水。蠱生於濕。大戟能燥濕而有利水之特效。故能除蠱毒而治十二種水病也。腹滿急痛積聚。皆爲水濕阻滯所致。故以燥濕利水主治。因濕阻氣滯而中風。故除痰利水可以治之。因濕集於表面而皮膚疼痛。胸有積水而吐逆。故均以燥濕利水爲治。大戟爲險峻之藥。其性暴而其效捷。用得其當可立起沉疴。設有錯誤爲害亦大。如遇當用之證。不可懼其險峻而不用。亦不能忘其險峻而不慎也。

○甘棗湯 治腫及支滿澀飲

大棗 大戟 大黃 甘草 甘遂 黃芩 芫花 薊花

○大甘遂丸 治久澀留水澀飲

芫花 甘遂 葶藶子 大黃 苦參 大戟 芒硝 貝母 桂心

杏仁 巴豆 烏喙

第一方以大戟甘遂芫花薤花利水逐痰。甘草與甘遂相反。用其反使相激而利水也。大棗引諸藥入脾利水。黃芩清熱燥濕。大黃清熱導滯。腫及支滿澀飲皆爲積水所致。故以燥濕利水主治。本方較十棗湯愈猛。非大蓄水病不能用也。第二方以芫花葶藶子苦參大戟逐水。大黃芒硝烏喙巴豆破積。桂心散寒。貝母杏仁除痰利氣。本方不但利水。兼重破積。以久澀則氣滯而食不化也。寒積非溫不散。故寒溫並用。全方無一節制之藥。所以攻堅澀也。

澤漆

性味 苦微寒無毒

效用 主皮膚熱大腹水氣四肢面目浮腫丈夫陰氣不足

說明 澤漆性味苦寒。本經主治皮膚熱。濕集於表而化熱則皮膚熱。故燥濕清熱可以治皮膚熱。腹中有水氣則氣不化而大腹。故燥濕清熱可以治大腹。濕集於四肢則四肢浮腫。濕集於面目則面目浮腫。苦能燥濕。寒能清熱。因濕化熱而腫。故燥濕清熱可以治面目浮腫也。濕阻則氣滯而不化。故陰氣不足。燥濕可以利氣。故能治丈夫陰氣不足。張氏醫通謂功類大戟。大戟大苦大寒。爲利水之峻藥。澤漆苦而微寒。故僅能治水氣。性味及治效均迥然有別。豈能相混。易簡方用以治癬瘡有蟲。可證明其爲燥濕之藥而非利水之藥也。

○澤漆湯 治肺癰咳而脉沉

半夏 紫參 澤漆 生薑 白前 甘草 黃芩 人參 桂枝

○澤漆湯 治水氣通身浮腫四肢無力喘息不安腹中響脹

澤漆根 鯉魚 生薑 赤小豆 茯苓 人參 甘草 麥冬

第一方以半夏散濕。紫參燥濕清熱。澤漆除水氣。生薑散結氣。白前降積氣。甘草解毒。黃芩燥濕清熱。人參益氣。桂枝行氣散濕。肺中積濕化爲熱毒。乃成肺癰。咳而脉沉爲濕阻氣滯之象。故燥濕利氣使濕化而氣和。則毒散而咳止矣。第二方以澤漆根燥濕治水氣。鯉魚利水消腫。生薑散結氣。赤小豆茯苓利濕。人參益氣。甘草和氣。麥冬瀉肺。本方所治爲水氣病。濕盛而尙未化水。故不用利水之猛藥。而以散結利氣主治。濕去則腫退而喘息自平矣。

### 常山

性味 苦寒有毒

效用 主傷寒寒熱發溫瘧鬼毒胸中痰結吐逆

說明 常山性味苦寒。本經主治傷寒寒熱。以傷寒寒熱由於挾濕化熱所致。

故以燥濕清熱主治凡濕之未化者爲寒濕之已化者爲熱故濕病寒熱間作而濕藥能兼治寒熱寒熱之寒發者當以溫燥主治熱發者應以苦寒主治也。因濕已化熱故熱發而爲溫瘧常山性味苦寒故能治溫瘧鬼毒爲毒之陰發者也。雖陰發既已化毒則亦屬於熱故治以苦寒濕阻而氣滯則分泌成痰故胸中痰結結而無出路則吐逆隨之矣。故燥濕可以利氣而除痰清熱可以止吐也。昔人以瘧爲痰病因常山上能涌吐風痰下能洩利故視爲截瘧之專藥實則其性極暴而其用極狹治溫瘧則佳並不能治一切瘧也。且瘧之多痰在於濕阻多痰爲瘧之病象並非瘧之病源瘧之病源在血輕者可以散濕利氣而愈重者鱉甲之效過於常山以常山祇能劫痰所治者爲標鱉甲能破癥瘕所治者爲本也。蘇頌曰常山蜀漆爲治瘧之最要不可多進令人吐逆震亨曰常山性暴悍善驅逐能傷真氣病人稍近虛怯不可用也皆爲經驗有得之言用常山者宜注意之。



○常山飲 治勞瘧

常山 知母 草果 良薑 烏梅肉 甘草 生薑 紅棗

○六和湯 治瘧久不愈

常山 知母 貝母 人參 草果 白芷 烏梅 檳榔 柴胡

生薑 紅棗

第一方以常山燥濕清熱。知母燥濕利氣。草果化濕散寒。良薑散寒逐邪。烏梅斂氣。甘草和氣。生薑散結。紅棗和胃。勞瘧爲寒濕病。濕化爲熱則寒熱交作。故苦寒以治濕熱。辛溫以散寒濕。濕阻則氣不和。散濕而和其氣。使氣和而瘧不作也。第二方以常山燥濕清熱。知母燥濕利氣。貝母除痰利氣。人參益氣。草果化濕散寒。白芷散濕。烏梅斂氣。檳榔破氣。紫胡燥濕利氣。生薑散結。紅棗和胃。濕阻則氣滯。正氣旣衰而寒濕勢盛。濕雖化熱。不能盡化。化者自化。生者自生。則循環不已。遂成久瘧。本方注重於燥濕除痰。若積濕不多。

而血未受病。猶可獲愈。否則非用清濕破血之藥。不能奏效也。

## 蜀漆

性味 辛平有毒

效用 主瘧及欬逆寒熱腹中癥堅痞積聚邪氣蠱毒鬼疰

說明 蜀漆性味辛平。本經主治瘧及欬逆。辛能散濕。瘧與欬逆。皆爲濕阻氣滯所致。故均以散濕主治也。濕滯爲寒。濕化爲熱。遂成寒熱。故散濕可以治寒熱。濕阻則氣滯。血積而爲癥堅。氣阻不化而成痞氣。血失調則飲食不化。而成積聚。氣不和而成邪氣。故散濕可以利氣而破癥堅積聚。蟲生於濕。故散濕可以除蠱毒鬼疰。蜀漆爲常山之苗。而性味各殊。效用有別。本經以常山治溫瘧。而蜀漆治瘧。是蜀漆可治一切瘧。而常山祇可治溫瘧也。李氏本草綱目附蜀漆於常山之後。而對於效用則混合言之。並無區別。於是後人

以常山爲治瘧之專藥而不復知有蜀漆矣。一切藥效。本經所載。最爲精審。醫家用藥。應宗本經。乃歷來治醫藥之人。雖首列本經。以張場面。察其所言。則絲毫不顧本經。或與本經衝突。或與本經重複。或本經早已明言。因不通本經。而偶有發見。反矜爲創獲。類此之事。筆不勝書。雖號稱一代名家者。亦所難免。往者已矣。余深望後之治醫藥者。弗蹈前人覆轍。使國醫藥日有進步也。

○蜀漆散 治多寒之牝瘧

蜀漆 雲母 龍骨 酢漿

○蜀漆丸 治勞瘧并積勞寒熱發作有時似瘧

蜀漆 麥冬 知母 白薇 地骨皮 升麻 甘草 鱉甲

烏梅肉 玉竹 常山 石膏 豉

第一方以蜀漆散濕利氣。雲母除痰。龍骨收瀉。酢漿斂氣。本方所治爲氣中

挾濕之病故以散濕收瀼除痰斂氣主治使濕去而氣和身自止也  
寒多以陰性而不化熱也並無大寒是以蜀漆之辛足以散之第二方以蜀  
漆散濕利氣麥冬知母瀉肺除痰白薇地骨皮清熱升麻散結甘草解毒鱉  
甲清血烏梅肉斂氣玉竹益氣常山清熱燥濕石膏清胃熱豉解表邪本方  
所治之病濕已化熱熱多寒少胃液不足血中有毒故寒以清熱辛以散濕  
滋胃液以助其宣化清血毒以止其寒熱各方竝治使歸於和此為極難治  
之病本方顧慮周到組織極佳非名手不能出此也

### 葶藶

性味 辛寒無毒

效用 主癥瘕積聚結氣飲食寒熱破堅逐邪通利水道

說明 葶藶性味辛寒本經主治癥瘕積聚以其能散濕而利水也氣不化則

爲結氣。飲不化則爲積水。食不化則爲積食。其所以不化。爲水濕所阻也。故散濕利水可以治結氣。而消飲食。水濕積滯則氣化失調。而發爲寒熱。故散濕利水可以治寒熱。食積成堅。氣阻成邪。散濕可以破積。利水可以逐邪。辛能散氣。寒能清熱。因積水化熱。而治以辛散。上可以開肺閉。而下可以通腎氣。上下既通。則運化力得以回復。而積水不能容留矣。故能通利水道也。葶藶有甜苦二種。李氏本草綱目謂甜者泄肺而不傷胃。苦泄者肺而易傷胃。若信李氏之言。未有不舍苦而用甜者也。實則本經所載之葶藶。性味辛寒。另有味甘者。雖亦名葶藶。非本經之所謂葶藶。不能牽混。以誤病家。蓋葶藶爲利水之猛藥。無水原可不用。若確有積水。則必氣結而食飲停滯。在此情形之下。利水正可和胃。安有傷胃之理。故不用葶藶則已。如用葶藶。則當用苦者。李氏之言。教人敷衍塞責。足以貽誤病家。不可從也。

○瀉肺湯 治肺癰喘不得臥

葶藶 大棗

○大陷胸丸 治結胸項強如柔痙狀下之則和

大黃 葶藶 芒硝 杏仁 甘遂 白蜜

○椒目丸 治腹滿口乾燥腸中有水氣

椒目 木防已 大黃 葶藶 蜜

第一方以葶藶利水。大棗通竅。肺癰喘不得臥。以胸中有積水也。故以利水主治。本方用以治喘。非用以治肺癰也。第二方以大黃芒硝消熱導滯。葶藶甘遂利水。杏仁除痰。和之以蜜。水積則結胸項強如柔痙狀。氣阻血滯而失其活動力。故不但利水。兼導腸胃之積滯。使水去而各部皆和也。第三方以椒目燥濕利水。木防已除痰利水。葶藶散濕利水。大黃清熱導滯而和之以蜜。腸中有水氣則腹滿。水濕停滯而失其宣化之力。水氣不能上達則口乾。故燥濕利水。使積滯歸於消失。則運化力得以回復。腸無水氣則口不乾矣。

萹花

性味 苦寒有毒

效用 主傷寒溫瘧下十二水破積聚大堅癥瘕蕩滌胸中留澼飲食寒熱邪

氣利水道

說明 萹花性味苦寒。本經主治傷寒溫瘧。以苦能燥濕。寒能清熱也。並有利

水之效。故能下十二水。濕阻氣飲食不化而成積聚大堅。故燥濕利水可以破之。氣血阻滯氣成癥瘕。水飲不化則有留澼。飲食不消則發為寒熱。散為邪氣。故燥濕利水可以破癥瘕留澼。化飲食而除寒熱邪氣。因濕阻而水道不利。故燥濕可以利水道。萹花為利水之藥。本經以傷寒溫瘧舉例。明可以治傷寒溫瘧等病之一切蓄水證也。凡蓄水之證。雖發熱而清之無效。汗之不退。溫之不散。惟有利水可以奏功。李時珍曰。萹花蓋亦芫花之類。主治大

略相近據本經所載則蕘花苦寒芫花辛溫雖二者皆能利水而寒溫迥別蘇頌曰芫花春生苗葉小而尖似楊柳枝葉蘇恭曰蕘花苗但胡葵莖無刺與芫花全不相似二說同載於李氏本草綱目中以出於一人之手而矛盾若此幾於令人難信足見著述之不易也

○捶鑿丸 療腹中積聚邪氣寒熱消穀

甘遂 蕘花 芫花 桂心 巴豆 杏仁 桔梗

右方以甘遂蕘花芫花利水。桂心散寒。巴豆瀉積。杏仁瀉肺。桔梗散濕。腹中既有積水則氣失調和而為邪氣。發作寒熱而穀食不消。故蕩積利水。散寒化濕。可以除積聚。散邪氣。清寒熱。消穀食。本方寒溫並用。以積濕化熱。應寒以清熱。而濕之未化者仍為寒。當溫以散寒也。

芫花



性味 辛溫有小毒

效用 主欬逆上氣喉鳴喘咽腫短氣蠱毒鬼瘧疝瘕癰腫

說明 芫花性味辛溫。本經主治欬逆上氣。喉鳴喘。因氣中挾濕。積寒不化所致。故以散寒化濕主治也。喉間積濕不化。則氣阻而咽腫。濕盛而呼吸迫促。則短氣。故散寒化濕可以散咽腫而療短氣也。蠱毒爲虫病。散濕可以殺虫。故能治蠱毒。濕積而爲陰毒。則成鬼瘧。濕阻於胃經。則爲疝瘕。濕集於表而化毒。則爲癰腫。故散寒化濕可以治鬼瘧。疝瘕而散癰腫也。觀於本經主治各證。皆取其散寒化濕之效。並不用以利水。有時雖與利水藥同用。因化濕散寒而發生利水之效。此爲輔佐性質。非有獨立之利水力也。肘後治卒得咳嗽。備急方治卒嗽有痰。足證其散寒化濕之效。而並非爲利水之主藥也。

○芫花煎 治新久嗽

芫花 乾薑 白蜜

右方以芫花化濕散寒。乾薑溫肺。白蜜潤燥。寒濕阻滯則氣逆而咳。故化濕散寒可以利氣而止咳。本方所治純爲寒濕病。並無積水可利也。

### 篇蓄

性味 苦平無毒

效用 主浸淫疥癬疽痔殺三虫

說明 篇蓄性味苦寒。本經主治浸淫疥癬疽痔。均爲濕已化毒之外症。故以燥濕主治。燥濕可以殺虫。故曰殺三虫。別錄療女子陰蝕。以其有燥濕殺虫之效也。亦屬外用。甄權曰。煮汁飲小兒療虻虫有驗。可見篇蓄能外用亦能內服。惟效驗單純。故燥濕殺虫之外並無他用也。

○懊憹散 治濕蠱瘡爛除蠱

篇蓄 藿蘆 雷丸 青栝子 女青 桃仁

○青箱散 治熱病有蠱下部生瘡

青箱子 橘皮 蔦竹 藿蘆 甘草 狼牙

第一方以蔦竹藿蘆雷丸燥濕殺虫。青箱子治皮膚中濕熱。女青散邪惡氣。桃仁散血殺虫。蠱爲虫食病。由濕化毒而成。故以燥濕殺虫散血清熱主治。第二方以青箱子治皮膚中濕熱。橘皮散濕利氣。蔦藿蘆狼牙燥濕殺虫。甘草解毒。熱病有濕。濕熱下注則下部生瘡。故以燥濕利氣主治。便濕化而氣和。則病去而瘡愈矣。

### 商陸

性味 辛平有毒

效用 主水腫疔瘰癧。除癰腫。

說明 商陸性味辛平。本經主治水腫疔瘰癧。濕積則爲水腫。氣結血滯則爲

疝瘕寒濕積而不化則成痺。辛能散濕利氣。故能消水腫。療疝瘕而除痺也。濕熱化毒則爲癰腫。熨貼腫處亦能散濕而消腫。言其外治之功也。商陸爲散濕之藥。並非利水之藥。別錄用以散水氣。最爲切當。甄權瀉十種水病。若單獨用之。決難奏效。蓋用以消腫則佳。若用以利水。可爲輔佐藥而不能爲主藥也。

○牡蠣澤瀉散 治大病後腰以下腫

牡蠣 括萋根 蜀漆 葶藶 澤瀉 商陸 海藻

○麻子湯 治遍身流腫

麻子 赤小豆 商陸 防風 附子

第一方以牡蠣收瀋。括萋根清熱。蜀漆散濕。葶藶利水。澤瀉利濕。商陸海藻消腫。大病後腰以下腫。原爲濕病。未盡之濕集於腰以下也。故以散濕利水使之消腫。第二方以麻子驅風潤燥。赤小豆利水。防風驅風。附子逐濕。商陸

消腫。遍身流腫。以氣爲濕阻。失其統制運化之力。故驅風逐濕而微利其水。使濕散氣和。自能運化。則腫自退矣。

### 藜蘆

性味 辛寒有毒

效用 主蠱毒效逆洩痢腸澼頭瘍疥癢惡瘡殺諸蟲毒去死肌

說明 藜蘆性味辛寒。本經主治蠱毒效逆。洩痢腸澼。虫生於濕。故散濕可以治虫毒。肺中挾濕則效逆。腸中挾濕則洩痢。濕盛則腸澼。故散濕清熱可以治效逆洩痢腸澼也。頭瘍疥癢惡瘡。均爲濕熱化毒所致。故散濕清熱可以殺虫而療頭瘍疥癢惡瘡也。濕阻氣滯則成痹。久痹不化則爲死肌。辛能散濕利氣。故可以除痹而去死肌。藜蘆味極辛。濕阻痰盛者服之。可以取吐。以散而不能下。達則上涌而吐也。別錄謂不入湯用。故或爲丸。或爲散以服之。

治外證皆用以傳塗患處。不用以服食也。

○藜蘆丸 治小兒泄清利

藜蘆 黃連 附子

○玉竹丸 治熱病時氣下赤白痢遂成蠱

玉竹 藜蘆 烏頭 桂心 黃連 雲實 代赭

第一方以藜蘆清熱散濕。黃連清熱燥濕。附子溫散風寒。小兒泄清痢。因腸中有積濕而不能運化也。故以清熱除濕溫散風寒主治之。凡濕病積久則化熱。化之不盡。其所餘者必為寒濕。而當用溫化也。故寒溫並用。寒以清已化之熱。溫以散未化之濕也。第二方以玉竹去風熱。藜蘆散濕熱。烏頭散風濕。桂心散寒。黃連燥濕清熱。雲實殺虫。代赭收瀉。熱病濕未蓋化則下注而為痢。雖痢而濕熱不清。化毒而為蠱。故驅風化熱燥濕殺虫。使痢止而蠱盡也。

# 旋覆花

性味 鹹温有小毒

效用 主結氣脇下滿驚悸除水去五臟間寒熱補中下氣

說明 旋覆花性味鹹温。本經主治結氣脅下滿。以鹹能制血利氣而散結。温能化寒也。氣結則水不化而脅下滿。散結利氣故能除脅下滿。水濕阻滯則氣不化。濕化熱則驚悸。旋覆花有制血利氣之效。氣化則水不能留。故能除水。水濕積於五臟則五臟不和而發為寒熱。故除水可以去五臟間寒熱。因五臟不和則營養不足。並氣為濕阻而不能下達。五臟既和則營養足。氣阻除而得以下達。故曰補中下氣。是以瀉為補。而非補不足也。本經首先揭出結氣二字。係表明旋覆花為氣藥。濕在氣中。或水為氣阻則可以治之。若有多量之水而不屬於氣阻者不能治也。別錄主治心脇痰水。膀胱留飲。則恰

如其分甄權主治水腫則超過其效力矣。

○旋覆代赭湯 治傷寒汗下後心下痞堅噫氣不除

旋覆花 甘草 大棗 生薑 代赭石 半夏 人參

○旋覆花湯 治胸膈痰結唾如膠不下食

旋覆花 細辛 前胡 茯苓 甘草 生薑 桂心 半夏 烏頭

○旋覆花丸 治停痰癖飲結在兩脅腹脹滿羸瘦不能食食不消化喜

吐乾嘔大便或澀或利腹中動搖作水聲內熱口乾好飲水漿卒起頭

眩欲倒脅下痛

旋覆花 桂心 枳實 人參 吳茱萸 細辛 大黃 黃芩

葶藶 厚樸 芫花 橘皮 乾薑 芍藥 白朮 茯苓 狼毒

烏頭 礬石 甘草

第一方以旋覆花治氣中積濕。甘草大棗治臟腑邪氣。生薑散結利氣。代赭



收瀆利氣。半夏散濕利氣。人參除邪氣。傷寒汗下後心下痞堅。水濕不化而氣結鬱積也。故全方純用氣藥。使濕化而氣行。則痞堅散而噫氣除矣。用藥精審。悉合本經者。仲景之外。殆無其人。此治醫者所以必須讀仲景書而精究本經也。第二方以旋覆花治氣中積濕。細辛散結利氣。前胡燥濕利氣。茯苓滲濕。甘草治臟腑邪氣。生薑散結氣。桂心散寒。半夏散濕。烏頭驅風散濕。胸膈痰結。氣滯不化。分泌物皆變爲痰也。故本方專治氣中之濕。使濕散而氣和。則分泌物悉供營養而不復化痰矣。第三方以旋覆花治氣中積濕。細辛散結利氣。狼毒破積聚。飲食。礞石攻堅癖邪氣。枳實大黃清熱導滯。葶藶芫花消水利氣。茯苓滲濕。烏頭驅風散濕。厚樸燥濕散寒。白朮散濕利氣。黃芩清熱燥濕。桂心吳茱萸乾薑散寒化濕。橘皮散濕利氣。芍藥燥濕利氣。甘草人參逐邪利氣。本方所治之病。起於濕阻氣結。卒至運化停滯。故散濕利水。攻堅破積。併力致治。使臟腑積垢一掃而空。氣化得以回復。則百病全除。

矣。用此方以治此病。實極和平。現在丸散中多有猛藥以取效者。故專治雜病者類能奏效。而名醫反爲束手也。

### 青箱子

性味 苦微寒無毒

效用 主唇口青

說明 青箱子性味苦寒。本經主治唇口青。以肝經有積熱也。故唇口青爲肝經有積熱之證象。而青箱子爲治唇口青之專藥。大明治五臟邪氣。益腦髓。鎮肝。明耳目。堅筋骨。去風寒濕痹。均爲燥濕利氣之效。肝與目通。肝爲濕熱阻滯則目病。故燥濕洩肝可以明目也。

○青箱子丸 治肝心毒熱丁瞽入黑睛

青箱子 藍實 炒枳殼 炒大黃 菊花 炙甘草 草決明

黃連 羌蔚子 細辛 麻黃 車前子 鯉魚膽 雞膽 羚羊角

右方以青葙子草決明鯉魚膽鷄膽羚羊角清肝熱。藍實大黃清血熱。黃連清熱燥濕。麻黃細辛散濕利氣。羌蔚子散血。炒枳殼利氣。菊花散風熱。甘草散五內邪氣。車前子利濕。肝熱則目生丁翳。則清肝熱並散血利氣。使熱洩而氣和。肝氣平則目病治矣。本方中之大黃甘草均當用生者。不當炒炙也。

### 貫衆

性味 苦微寒有毒

效用 主腹中邪熱氣諸毒殺三虫

說明 貫衆性味苦寒。本經主治腹中邪熱氣諸毒。以苦能燥濕利氣。寒能清熱也。虫生於濕。故燥濕可以殺虫。雖有毒而可以解毒。凡蘊結之毒發於外者。治以貫衆。最爲有效。骨硬在喉。煎汁服之。可使軟化。能行血亦能止血。血

崩則散其結而止。血阻則通其滯而行。皆取其燥濕之效也。

○黃連散 治腸風下血疼痛不止

黃連 貫衆 雞冠花 烏梅肉 大黃 炙甘草

○玉屑無憂散 治纏喉風咽喉痛語聲不出嚔物有碍

元參 貫衆 滑石 砂仁 黃連 炙甘草 茯苓 山豆根

荆芥穗 硼砂 寒水石

第一方以黃連貫衆清熱燥濕。雞冠花清熱散血。烏梅肉收瀉利氣。大黃清熱導滯。炙甘草和氣。腸風下血。因濕阻氣滯而血積也。濕化爲熱則積血成爲敗血而下矣。故燥濕清熱使濕化熱退而血止也。第二方以元參黃連清熱燥濕。寒水石硼砂散濕清熱。滑石收瀉。貫衆燥濕解毒。砂仁散結利氣。荆芥穗散風逐濕。茯苓利濕。山豆根解咽喉腫痛。炙甘草和氣。纏喉風爲咽喉中濕阻化毒所致。故以散濕清熱解毒利氣主治。使濕散而氣和。則毒去而

痛止矣。

## 狼毒

性味 辛平有大毒

效用 主效逆上氣破積聚飲食寒熱水氣惡瘡鼠癭疽蝕蠱毒

說明 狼毒性味辛平。本經主治效效上氣。以氣中挾濕而效。故散濕可以止效而利氣也。濕阻則運化停滯。飲食不消而有積聚。故散濕可以破飲食積聚。濕滯則寒。濕化則熱。故散濕可以治寒熱。氣中積濕不化則為水氣。故散濕可以化水氣。濕化成毒則集表而為惡瘡鼠癭疽蝕。主於腸則為蠱毒。故散濕可以治惡瘡鼠癭等諸濕毒證也。別錄除胸下積癖。以辛能散結也。大明治痰飲癥瘕。以其能散寒逐濕而破堅積也。惟其性猛悍。苟無堅癖。不可輕用。

○狼毒丸 治堅癖

狼毒 半夏 杏仁 桂心 附子 蜀椒 細辛 蜜

右方以狼毒散寒逐濕。半夏散濕利氣。杏仁燥濕散寒。桂心散寒。附子驅風散濕。蜀椒細辛散結利氣。和蜜爲丸。寒濕阻滯。乃成堅癖。故散寒逐濕。使胸中積滯不能存留。則堅癖自散矣。狼毒所攻。係屬寒濕阻滯之氣病。非有實積也。

狼牙

性味 苦寒有毒

效用 主邪氣熱氣疥癢惡瘍瘡痔去白虫

說明 狼牙性味苦寒。本經主治邪氣熱氣。以氣中挾濕。化熱則爲邪氣熱氣。故苦以燥濕。寒以清熱。可以治邪氣熱氣也。濕熱化毒則爲疥癢惡瘍瘡痔。

故以燥濕清熱主治。大明殺腹臟一切虫。止赤白痢。腹臟有積濕則生虫。清熱燥濕兼能殺虫。故用以爲治。腸有積濕則胃中消化之物輸注於腸而不能運化。遂下赤白痢。故燥濕可以回復其運化力而治赤白痢也。狼牙能內服。亦能外治。雖有毒。可以殺虫而不致傷人也。

○九痛丸 治九種心痛

附子 生狼牙 人參 吳茱萸 乾薑 巴豆霜

右方以附子散濕逐寒。生狼牙燥濕清熱。人參除臟腑邪氣。吳茱萸乾薑散寒。巴豆霜散寒去積。處方之意。或用狼牙以殺虫。其實所謂心痛。係氣阻所致。與肝胃有關。而與心無涉。且未必有虫。以服殺虫藥者多瀉。雖不殺虫亦可去積。故能有效。惟攻之過度。可使氣虛而痛必增劇。不可不慎也。

鬧羊花

性味 辛温有大毒

效用 主賊風在皮膚中淫淫痛温瘧惡毒諸痹

說明 鬮羊花性味辛温。本經主治賊風在皮膚中淫淫痛。以辛温可以散氣。故能治賊風。温瘧為濕病。辛温可以散濕。故用以為治。惡毒為濕氣所化。辛温可以散濕。故能治惡毒。氣阻不化則成痹。辛温可以散氣。故能除痹。鬮羊花有大毒而其性猛烈。用之不當。可以殺人。苟無安全把握。不可輕用也。

○八風散 治八風十二痺。猥退半身不遂。歷節疼痛。肌肉枯燥。皮膚瞶動。或筋緩急痛。不在一處。卒起目眩失心恍惚。妄言倒錯。身上痞瘰。面上起疱。或黃黑角弓及張乍寒乍熱。

- |    |    |    |    |    |     |     |    |    |
|----|----|----|----|----|-----|-----|----|----|
| 麻黃 | 白朮 | 羌活 | 黃芩 | 大黃 | 栝蔞根 | 甘草  | 欒荆 | 天雄 |
| 白芷 | 防風 | 芍藥 | 天冬 | 石膏 | 山萸  | 食茱萸 | 躑躅 | 茵芋 |
| 附子 | 細辛 | 乾薑 | 桂心 | 雄黃 | 硃砂  | 丹參  |    |    |



右方以麻黃。欒。荆。天。雄。白。芷。防。風。躑。躅。茵。芋。驅。風。白。朮。附。子。羌。活。乾。薑。食。茱。萸。山。茱。萸。細。辛。桂。心。散。濕。逐。寒。黃。芩。芍。藥。丹。參。大。黃。栝。樓。根。石。膏。燥。濕。清。熱。雄。黃。硃。砂。天。冬。化。濕。除。痰。甘。草。和。臟。腑。邪。氣。遍。體。風。濕。內。外。俱。病。苟。不。用。此。治。風。大。方。已。無。生。理。故。不。忌。大。毒。之。藥。驅。風。散。濕。除。痰。利。氣。清。熱。化。寒。幾。於。無。藥。不。猛。雖。若。溫。清。並。用。而。溫。以。逐。寒。清。以。化。熱。仍。循。治。濕。之。軌。道。以。溫。散。太。過。而。用。石。膏。以。滋。胃。液。人。參。以。和。臟。腑。之。氣。組。織。謹。嚴。一。絲。不。亂。一。見。其。方。即。能。推。知。其。確。可。治。此。重。證。也。躑。躅。又。名。羊。躑。躅。即。鬧。羊。花。

### 甜瓜蒂

性味 苦寒有毒

效用 主大水身面四肢浮腫下水殺蠱毒效逆上氣及食諸果病在胸腹中

皆吐下之

說明 甜瓜蒂性味苦寒。本經主治大水身面四肢浮腫下水大水大蓄水證也。水積不化則身面四肢皆浮腫。故以燥濕清熱主治也。燥濕清熱可以化水而消腫。其不化者自能下達。故曰下水也。腸中生蟲曰蠱。以蠱生於濕。故燥濕下水可以殺蠱毒。胸中有水濕則氣阻而效逆上氣。故燥濕下水可以治效逆上氣。食諸果不消。則積而爲病。以胸腹中有積水也。燥濕則胸腹之水受激刺。積水上涌則吐。下達則瀉。或由小便洩出。故曰吐下之也。或以甜瓜蒂爲吐藥。於此可知不僅能吐。亦能使下也。

○瓜蒂散 治胸中寒痰

甜瓜蒂 赤小豆

○三聖散 吐餘痰

瓜蒂 藜蘆 防風 藜汁

○勝金丹 治痰盛

薄荷 瓜蒂 藜蘆 牙皂角 硃砂

第一方以瓜蒂赤小豆下水。胸中有寒痰。因積而不化。故以燥濕下水。主治洩去其水。則痰可自化也。苟不能下。達則上涌而吐。使之分化也。第二方以防風驅風。瓜蒂藜蘆薑汁。涌吐風痰。因氣阻而餘痰不盡。故以散氣吐痰爲治也。第三方以薄荷牙皂角散結氣。瓜蒂藜蘆吐頑痰。硃砂下氣。本方治痰結氣滯之病。故以散結利氣爲主。而佐之以涌吐。

### 葇苳子

性味 苦寒無毒

效用 主齒痛出蟲肉痺拘急。久服輕身。使人健行走。及奔馬強志。益力通神。見鬼多風。令人狂走。

說明 葇苳子性味苦寒。本經主治齒痛出蟲。肉痺拘急。以苦能燥濕。寒能清

熱也。齒痛爲濕病。因濕化熱而痛。故燥濕清熱可以止痛。齒中有蟲燥濕則蟲不能存。故曰出蟲。濕阻則氣不化而肉痺。筋不舒而拘急。故燥濕可以治肉痺而療拘急。久服輕身。以營養不足而體重減輕也。使人健行。以食之不能安定。非行不可也。發狂則走及奔馬矣。強志益力。則氣力甚大而意志堅強。凡瘋狂之人莫不如此。通神見鬼。則直書其發狂之象。凡本經所載。類此者不一而足。以上古尙未發見五穀。故人民任採草木而食之。既食則記其效驗。以後之食品與藥物。皆從此記載中抉擇鑑定而來。後人誤會經意。以爲服之可以神仙不死。乃反促其壽矣。苒苒子生服易於中毒。故藥用者皆經酒浸或酢漬而炒研之。以避其毒而收除痰利水之效。是以千金翼用以療水腫。古今錄驗用以治五癩也。

○苒苒子散 治五癩反側羊鳴目翻吐沫不知痛處

豬卵 苒苒子 牛黃 鯉魚膽 桂心

○苒芎丸 治水氣腫鼓脹小便不利

苒芎子 羚羊肺

第一方以豬卵通肺腎之氣。苒芎子牛黃除痰清熱。鯉魚膽瀉肝。桂心散結氣。五癩反側爲肝熱痰積所致。故利氣以疏肝。除痰以導積。使積去而氣和也。此病不治自愈。愈而復發。發無定時。此方極簡單。不知能治本否。第二方以苒芎子利水消腫。羚羊肺通肺氣利小便。使水有出路以消水腫也。

蚤休

性味 苦微寒有毒

效用 主驚癇搖頭弄舌熱氣在腹中

說明 蚤休性味苦寒。本經主治驚癇。搖頭弄舌。熱氣在腹中。以氣中挾濕則化熱而成驚癇。故燥濕清熱可以治驚癇。搖頭弄舌爲熱結所致。故曰熱氣

在腹中燥濕清熱則可以散結而治腹中熱氣也。別錄治癥瘕癰瘡陰蝕下三蟲去蛇毒。以除痰燥濕而兼有殺蟲解毒之效也。服之能致吐利。

○溫脾散 治瘧

紫河車 菘豆 甘草 砒

右方以紫河車砒吐利痰積。菘豆甘草解砒毒。以為治瘧最拙劣之法。且瘧之原因不盡在痰。故服之未必有效。紫河車即蚤休。或名草紫河車。以人胞亦名紫河車。故加草字以別之也。

白及

性味 苦平無毒

效用 主癰腫惡瘡敗疽傷陰死肌胃中邪氣賊風鬼擊痲緩不收

說明 白及性味苦平。本經主治癰腫惡瘡敗疽傷陰死肌。以苦能燥濕。故用

治外證之未潰者。可以消腫。已潰者。可以止腐而收口。傷陰謂傷於陰濕。死肌則濕阻氣滯而麻木不仁也。故燥濕可以散氣而治傷陰。瘵死肌。胃有積濕。則發為邪氣。故燥濕可以散邪氣。賊風鬼擊。痲緩不收。均為風病。燥濕可以驅風。故用為主治也。李杲用以止肺血。震亨曰。凡吐血不止。宜加白及。時珍曰。白及性瀋而收。得秋金之令。故能入肺止血。生肌治瘡。白及能收瀋而有黏性。內服可以燥濕殺蟲。外治可以防腐收口。故能統治內外瘡傷也。

○阿膠散 治肺破嗽血唾血

阿膠 白及 天門冬 人參 五味子 生地黃 茯苓 蜜

秫米 生薑

○內托散 治一切癰疽發背無頭惡瘡化毒為水從小便出

乳香 穿山甲 白及 知母 貝母 半夏 金銀花 皂角刺

天花粉 酒

第一方以阿膠散血。白及燥濕。天門冬瀉肺。人參和氣。五味子斂氣。生地黃清熱。苓苓利濕。蜜秫米潤肺。生薑散結。利氣嗽血吐血。由於肺破。清熱利濕。使血不橫溢。而以瀉肺潤肺和其氣。各家均言白及有止血之效。當以收瀆而有黏性之故也。第二方以乳香和血。穿山甲皂角刺散血。白及燥濕。知母貝母半夏除痰下氣。金銀花解毒。天花粉清熱。用酒煎。使藥力易於透達。患處也是否能化毒而從小便洩出。未經實驗。無從證明。諸藥均極和平。不致有害。患者不妨一試也。

### 白欬

性味 苦平無毒

效用 主癰腫疽瘡散結氣止痛除熱目中赤小兒驚癇溫瘧女子陰中腫痛帶下赤白



說明 白藪性味苦平。本經主治癰腫疽瘡。散結氣。止痛除熱。因濕化爲毒而  
成癰腫疽瘡。故以燥濕主治。氣中挾濕不化則爲結氣。故燥濕可以散結利  
氣。濕化爲毒而發炎則痛。故燥濕可以止痛除熱。肝爲濕阻而化熱則目中  
赤。氣中挾濕化熱則爲驚癩。寒濕化熱則爲溫瘧。故燥濕可以治目中赤而  
療驚癩溫瘧也。陰中腫痛與帶下赤白。均爲積濕化熱所致。故以燥濕爲治  
也。肘後方以白及末調塗發背初起。外臺傳湯火灼傷。皆取其燥濕散毒之  
效也。

○內消散 治癰疽結硬疼痛

人參 瞿麥 白藪 升麻 當歸 黃芩 防風 黃耆 沉香  
甘草 赤小豆 酒

○通明散 治眼氣輪受病

升麻 山梔子 蟬蛻 五倍子 甘草 細辛 川芎 楊梅根皮

防風 羌活 草決明 白及 白蘞 夏枯草 白芷 淡竹葉

第一方以人參治五內邪氣。甘草解毒。黃耆排膿止痛。瞿麥赤小豆利水消毒。當歸行氣散濕。白蘞燥濕。升麻散腫洩毒。防風散濕利氣。沉香散結利氣。黃芩清熱燥濕。酒行氣活血。本方之旨在使癰疽內消。故將其病源逐一疏解。雖不能盡散。定可改輕不少也。第二方以升麻細辛散結利氣。白及燥濕。白芷散濕。防風驅風。羌活白蘞楊梅根皮利濕。川芎夏枯草決明平肝利氣。山梔子淡竹葉清熱。蟬蛻除障。五倍子收瀉利氣。甘草和氣。眼氣輪受病。爲風濕所阻也。故驅風燥濕。使邪氣無容留餘地。並注重於肝。肝氣一和。則目可無病矣。

鬼白

性味 辛溫有毒

效用 主殺蠱毒鬼疰精物辟惡氣不祥逐邪解百毒

說明

鬼臼性味辛溫。本經主殺蠱毒。有大毒而可以攻毒。故能殺蠱毒也。鬼疰精物皆爲蟲病。以目不能見蟲。故名其所傷曰鬼疰。甚或知其已傷而目不能辨其傷處。故名之曰精物。雖不能得其致傷之真象。而確知其爲蟲病。故以鬼臼治之。不正之氣爲惡氣。變異之氣爲不祥。氣不正而有變異。爲將病之象。故散以辛溫。使氣和而不病也。濕化熱則發爲邪氣。血中毒亦發爲邪氣。辛溫可以散氣。故用以逐邪氣而解百毒也。鬼臼不但辛散。並有攻下之力。故能除呆痰。亦能下攻胎。三十六黃方用以治急黃。以其有散濕攻毒之效也。惟所治均爲邪病。無邪者不可輕用。

○太陰追命丸 治百病若中惡氣心腹脹滿不得喘息心痛積聚臃脹

疝瘕宿食不消吐逆嘔噦寒熱瘰癧蠱毒婦人產後餘疾

蜈蚣 丹砂 附子 礬石 雄黃 藜蘆 鬼臼 巴豆 蜜

○萬病丸 治蠱症四肢浮腫肌膚消索欬逆腹大如水狀

雄黃 巴豆 莽草 鬼白 蜈蚣

第一方以蜈蚣鬼白散氣解毒。丹砂消散陰濕。附子驅風散濕。雄黃導積逐邪。礬石收瀉消積。藜蘆散濕解毒。巴豆蕩積逐寒。蜜以爲丸。本方所治之病。因寒濕積滯。化爲邪氣熱毒。故以散邪攻毒之藥治之。第二方以雄黃逐邪。巴豆蕩積。莽草消腫。蜈蚣鬼白殺蟲解毒。本方所治爲陰濕化蟲之病。故以導積利水爲主。而佐以殺蟲。使濕散而蟲盡也。

### 梓白皮

性味 苦寒無毒

效用 主熱毒去三蟲

說明 梓白皮性味苦寒。本經主治熱毒。殺三蟲。以其有清熱燥濕之效而並

能殺蟲也。別錄療目中疾。主吐逆胃反。小兒熱瘡。身頭熱煩。蝕瘡。煎湯浴之。并搗傅目疾。屬於濕熱爲患。故以清熱燥濕主治。胸中有水濕則失其運化。力而吐逆胃反。故以清熱燥濕主治。濕化爲熱毒則成熱瘡。而身頭煩熱。故燥濕可以治熱瘡。而除煩熱。蝕瘡爲蟲病。燥濕可以殺蟲。煎湯浴之。并搗傅患處。用以燥濕殺蟲也。肘後方。煎汁服之。治時氣溫病。頭痛發熱。可知梓白皮不但專治熱毒。兼能治溫熱病也。

○麻黃連軹赤小豆湯 治傷寒瘀熱在裏身體發黃

麻黃 赤小豆 連軹 杏仁 大棗 梓白皮 生薑

甘草

右方以麻黃散濕。赤小豆利水。杏仁瀉肺。連軹梓白皮清熱利濕。生薑散結氣。大棗甘草治心腹邪氣。濕化爲熱。蘊結不散則發黃。燥濕清熱。散結利氣。使濕化熱退而氣和。則黃退矣。

# 柳花

性味 苦寒無毒

效用 主風水黃疸面熱黑

說明 柳花性味苦寒。本經主治風水黃疸。以苦能燥濕利氣。濕去則水化。氣和則風散也。濕化爲熱積而不散則成黃疸。故燥濕清熱可以治黃疸。面熱黑爲積濕化熱所致。故以燥濕清熱主治。柳花與柳絮容易牽混。而後人花絮並稱。蓋初開者爲柳花。及花謝而隨風飛舞者爲柳絮。本經主治各病。均用花而不用絮。花能清熱燥濕。絮能止血。故外臺以柳絮止金瘡血出。集效良方以柳花治大風癩瘡。足證二者各有主治。不能混用也。

○吉祥丸 治婦人積年不孕

天麻 柳花 牡丹 茯苓 乾地黃 桂心 五味子 桃花

白朮 川芎 覆盆子 桃仁 兔絲子 楮實子

右方以天麻川芎疏肝利氣。覆盆子兔絲子楮實子溫腎散濕。白朮茯苓利濕。柳花桃花利水。牡丹桃仁破血散結。五味子欬氣。乾地黃清熱。桂心散寒。積年不孕。病在濕阻。濕阻則氣滯而肝腎兩虛。故散濕利氣。使能調和。則可以受孕矣。惟不孕之原因甚多。或極簡單。或極複雜。非有精確之診斷不能施治。卽以此方論。服之亦未必有效。不過示使用柳花之一例耳。

### 郁李仁

性味 酸平無毒

效用 主大腹水腫。面目四肢浮腫。利小便水道。

說明 郁李仁性味酸平。本經主治大腹水腫。以酸能收瀼而泄水也。水積不

化。則散於面目。溢於四肢。而無處不腫矣。泄去其水。則小便利而水道通。甄

權治腸中結氣。關格不通。因濕阻而氣結。故泄水可以散結氣而通關格。李杲專治大腸氣滯。燥瀆不通。皆能體會本經意旨而善用其長者也。時珍曰。郁李仁甘苦而潤。其性降。故能下氣利水。雖強變其性味。依然不能說出利水之理由。蓋濕病絕不能潤。潤之足以助濕。凡治濕病而曰潤燥。皆燥濕以。使潤。非用潤藥以使之不燥也。凡釋藥而不通此意者。比比皆是。不獨李氏爲然。能明白此意。可認識不少藥效也。

○五仁丸 治津液枯竭大腸秘澀傳導艱難

桃仁 杏仁 柏子仁 松子仁 郁李仁 陳皮

○木香和中丸 治大便秘

木香 沉香 白豆蔻 炒枳實 檳榔 蓬朮 青皮 陳皮

當歸 黃芩 木通 黃連 砂仁 豬牙皂角 郁李仁 三稜

大黃 香附 牽牛 黃蘗



第一方以桃仁破血利氣。杏仁散濕利氣。柏子仁松子仁燥濕驅風。郁李仁收瀆利氣。陳皮散濕利氣。濕阻血滯則氣不運而津液枯竭。故大便秘澀。傳導艱難。破血利氣。散濕驅風。使其回復運化。則燥者自潤。傳道不難矣。藥中諸仁。皆用其燥而不用其潤也。故濕阻氣滯者可用。熱極而真燥者不可用。第二方以木香下滯氣。沉香化積氣。白豆蔻散肺氣。炒枳實除痰氣。陳皮檳榔青皮皂角散滯氣。蓬朮三稜破血氣。砂仁香附開鬱結。牽牛通風閉。當歸行氣血。黃芩黃連黃蘗清熱燥濕。大黃清熱導滯。水通利水。郁李仁收瀆。本方以散濕清熱利氣主治。如病之不屬於濕阻氣滯者。不宜用之。

## 巴豆

性味

辛溫有毒

效用

主傷寒溫瘧寒熱破癥瘕結聚堅積留飲痰癖大腹蕩練五臟六腑開

通閉塞利水穀道去惡肉除鬼毒蠱疰邪物

說明

巴豆性味辛溫。本經主治傷寒溫瘧。以辛溫能散寒濕也。因其有蕩積

攻堅之效。故用以破癥瘕結聚。堅積留飲。大腹蕩練五臟六腑。開通水穀道。

去惡肉。以其能腐蝕惡肉也。除鬼毒蠱疰邪物。以其能殺蟲攻毒而破氣也。

巴豆辛烈而毒。用之不當。爲害匪淺。故用時或炒焦研細。或去油取霜。或和

蠟爲丸。以減其毒而使和緩。凡寒積之病。非此不除者。用以攻散。極有效驗。

但須認清人之虛實。病之輕重。爲適當之施治。則雖極辛毒。亦可萬全。如認

證不清。輕試少用。攻之不克。則脹滿有加。用量太多。瀉利過度。則氣虛爲患。

世人莫不知巴豆爲下藥。而李時珍以蠟置巴豆丸藥五十九丸。治一年逾六

十老婦之溏泄病。竟不瀉而愈。此後用治泄痢。歷試不爽。故認爲峻用有戡

亂劫病之功。微用亦有撫綏調中之妙。得心應手。輕重咸宜。若李氏者可謂

善用巴豆者矣。

○備急丸 治心腹卒痛如錐刺宿食冷積脹滿

巴豆 乾薑 大黃 蜜

○消積丸 治小兒食積發熱大便酸臭

巴豆 丁香 砂仁 烏梅

○細丸 治客熱結塞不流利

大黃 葶藶 香豉 杏仁 巴豆 蜜

第一方以巴豆破寒積。乾薑散寒。大黃通利水穀。蜜以爲丸。心腹卒痛。以有宿食冷積也。故用辛溫以散寒破積。因寒能化熱。故兼用寒藥以蕩滌腸胃。以蜜爲丸。有解毒調和之效也。第二方以巴豆破寒積。丁香治虛冷。砂仁調胃順氣。烏梅斂氣。因積食不消而大便酸臭。發熱。係寒積化熱。故散寒破積。佐以利氣主治。第三方以大黃清熱散結。葶藶行水利氣。香豉散濕。杏仁瀉肺。巴豆散寒積。蜜以爲丸。客熱係濕化熱。濕阻則氣滯而結塞不流利。故行

水散濕。破結蕩積。寒溫並用。使已化未化之濕。同時疏散。大小便得以流利。

### 雷丸

性味 苦寒有小毒

效用 主殺三蟲逐毒氣。胃中熱。利丈夫。不利女子。

說明 雷丸有殺蟲之效。服之能致吐利。以性味苦寒。故可清胃熱。逐毒氣。本經所謂利丈夫。不利女子。以利其疏利丈夫之精氣。不能疏利女子之精氣也。別錄有久服令人陰痿之說。此為疏利過度之明證。今人用以治蟲病。即本經殺三蟲逐毒氣之效也。

○化蟲散 治蟲病

雷丸 檳榔 鶴蝮 輕粉 史君子

○補金散 治諸般蟲痛

鶴蝨 雷丸 定粉 黑錫灰

第一方以雷丸鶴蝨使君子殺蟲。檳榔散氣。輕粉利大腸。蟲病則食積而氣結。故以殺蟲消積利氣主治。第二方鶴蝨雷丸定粉黑錫灰。均為殺蟲之藥。以單純之蟲病。蟲去則病愈也。

### 代赭石

性味 苦寒無毒

效用 主鬼疰賊風蠱毒殺精物惡鬼腹中毒邪氣女子赤沃漏下

說明 代赭石性味苦寒。本經主治賊風蠱毒。腹中毒邪氣。以苦能燥濕利氣。並有殺蟲之效也。女子赤沃漏下。為濕熱下注所致。故以燥濕清熱主治。別錄除五臟血脈中熱。血痹血瘀。是代赭石不但能清熱燥濕。並能散血也。故普濟方用以治婦人血崩。斗門方用以治腸風下血也。

○代赭丸 治水瀉腸鳴臍腹撮痛

附子 代赭石 乾薑 龍骨

○赤散 治產後下痢

赤石脂 代赭石 桂心

第一方以附子乾薑溫散寒濕。龍骨收瀋。代赭石燥濕破結。水瀉腹痛。爲寒濕阻滯所致。故以散濕逐寒爲主。寒濕旣散。則運化得以回復矣。第二方以桂心散寒。赤石脂收瀋。代赭石燥濕。腸有積濕。因寒滯則腸失吸收之力。而對於胃中消化之物。不能繼續其運化工作。遂下而爲痢。故散寒收瀋。可以回復其運化力而治下痢。

### 鉛丹

性味 辛微寒無毒

效用 主吐逆胃反驚癩癩疾除熱下氣

說明 鉛丹性味辛寒。本經主治吐逆胃反。以辛能散濕利氣也。濕化爲熱則氣阻而驚癩。積痰不化則神昧而癩疾。故清熱散濕可以利氣而治驚癩。燥濕化痰可以治癩疾也。濕化爲熱則氣阻。辛能散濕。寒能清熱。故可以除熱而下氣。外治有生肌止痛之功。亦取其清熱散濕之效也。

○柴胡加龍骨牡蠣湯 治傷寒下後胸滿煩驚小便不利讖語一身盡重不可轉側

柴胡 龍骨 黃芩 生薑 鉛丹 人參 桂枝 茯苓 半夏  
大黃 牡蠣 大棗

○萬靈奪命丹 治一切瘡腫疔疽初起脈沉實及服汗藥後毒氣在裏不盡者宜此下之

朱砂 鹽花 雄黃 明礬 楓香 赤石脂 鉛丹 琥珀 輕粉

巴豆 蓖麻子 麝香 片腦

第一方以柴胡散腸胃結氣。龍骨牡蠣收瀆利氣。茯苓半夏鉛丹除痰下氣。大黃清熱蕩積。黃芩清熱燥濕。人參大棗治臟腑邪氣。生薑散結氣。桂枝散濕利氣。傷寒下後胸滿煩驚。一身盡重。濕阻氣滯所致也。故以散濕利氣主治。本方之意。著重和解。故以柴胡爲主藥。雖若病勢極重。而和之則愈。苟失此不治。必轉爲危證。此方爲和解之大方。極有研究之價值也。第二方以朱砂楓香蓖麻子麝香散毒。鹽花明礬輕粉片腦消腫。琥珀巴豆散血。雄黃鉛丹下氣。赤石脂收澀。此爲外證內陷。故以散血散毒下氣主治。

### 鉛粉

性味 辛寒無毒

效用 主伏尸毒螫殺三蟲



說明 鉛粉性味辛寒。能殺蟲。故本經主治伏尸毒螫。殺三蟲。伏尸係蟲名。宏景曰。胡粉金色者療尸蟲。彌良別錄去鱉瘕。療惡瘡。止小便利。墮胎。鱉瘕爲寒結所致。辛能散結。故可以去鱉瘕。惡瘡爲濕毒所化。故散濕可以療惡瘡。濕阻則水不化而小便利。故散濕可以化水而止小便利。辛能散結利氣。故能墮胎。藏器曰。久痢成疳者。胡粉和水及雞子白服。以糞便黑爲度。爲其殺蟲而止痢也。外治有生肌防腐之效。外科藥中常用之。

○化蟲丸 治蟲積肚腹常熱

鶴蝨 苦楝根 鉛粉 白礬

○甘草粉蜜湯 治蚘蟲爲病令人吐涎心痛發作有時

甘草 鉛粉 蜜

第一方以鶴蝨苦楝根鉛粉殺蟲。白礬收濕。熱病屬蟲積。故以殺蟲主治。第二方以甘草蜜治心腹邪氣。鉛粉殺蟲。蟲病則氣不和。故以殺蟲和氣爲治。

# 戎鹽

性味 鹹寒無毒

效用 主明目目痛益氣堅肌骨去毒蠱

說明 戎鹽性味鹹寒。本經主明目目痛。係外用。取其能解毒也。鹹能制血而利氣。故能益氣而堅肌骨。能解毒。故能去毒蠱也。別錄治心腹痛。瀉血。吐血。齒吞血出。皆取其制血利氣之效也。

○茯苓戎鹽湯 治胞中精枯血滯小便不利

白朮 茯苓 戎鹽

右方以白朮燥濕。茯苓利水。戎鹽清血。足見小便不利。係水濕阻滯所致。如因精枯血滯而致小便不利者。經燥濕利水之後。精益枯而血益滯矣。安有可愈之望乎。

# 夜明砂

性味 辛寒無毒

效用 主面癰腫皮膚洒洒時痛腹中血氣破寒熱積聚除驚悸

說明 夜明砂性味辛寒。本經主治面癰。皮膚洒洒時痛。以辛能散濕利氣。寒能清熱。故能散腫而止痛也。腹中有濕則氣血阻滯而有寒熱積聚。故以散濕利氣主治。熱而氣阻則驚悸。故清熱利氣可以治驚悸。日華炒服治瘰癧。以其能清濕熱也。時珍治目盲障翳。以其能疏肝而利氣也。

○退翳丸 治一切翳膜

黃連 白菊 夜明砂 車前子 蟬蛻 連翹 蛇蛻 猪肝  
薄荷

○羅漢雁夢丸 治內障及因病赤眼食鹹物而得者

夜明砂 當歸 蟬蛻 木賊 羯羊肝

第一方以黃連清濕熱。連翹白菊花清風熱。夜明砂疏肝利氣。車前子利水明目。蟬蛻蛇蛻驅風除翳。豬肝滌垢。薄荷散結。濕熱阻滯則生翳膜。故散濕利氣可以治翳膜。第二方以夜明砂疏肝。當歸燥濕利氣。蛇蛻除障。木賊驅風。羊肝補肝。鹹能制血。赤眼食鹹物則血驟然受制。氣亦隨之而滯。乃成爲障。故以燥濕驅風主治。使濕散氣和而障自去也。

### 蟾蜍

性味 辛涼微毒

效用 主小兒勞瘦疳疾

說明 蟾蜍性味辛涼。蘇頌主治小兒勞瘦疳疾。以辛能散結利氣。並有殺蟲之效也。別錄治獺犬傷。弘景搗汁治溫病發斑困篤之證。時珍治破傷風。是

不但能殺蟲。並有散血解毒之效也。破傷風爲常見之病。獾犬傷爲常有之事。以失治而死者不知凡幾。蟾蜍爲易得之物。乃以不知治法而束手待斃。故附述於此。以供患者之試用也。

○蟾蜍丸 治小兒疳積

蟾蜍 糞蛆 麝香

○木香丸 治冷疳

木香 青黛 檳榔 肉豆蔻 麝香 續隨子 蟾蜍 蜜 薄荷

第一方以蟾蜍散血破結。糞蛆消積。麝香利氣殺蟲。疳積爲蟲病。故以消積散結殺蟲主治。使蟲去積消而氣和也。第二方以木香肉豆蔻溫中利氣。麝香散結殺蟲。青黛清熱殺蟲。檳榔破積。續隨子利水。蟾蜍散血。薄荷散寒。以蜜爲丸。佐其潤下。冷疳因寒重而氣滯不化也。故以利氣爲主而兼用殺蟲破積之劑。使氣化蟲盡亦無後患也。

蜈蚣

性味 辛温有毒

效用 主鬼疰蠱毒。噉諸蛇蟲魚毒。殺鬼物老精。温瘧去三蟲。

說明 蜈蚣性味辛温。本經主治鬼疰蠱毒。以其能殺蟲而並能解毒也。故並治噉諸蛇蟲魚毒。鬼物老精。皆爲害蟲。故用以殺之。辛能散濕。故用以治温瘧。別錄療心腹寒熱積聚。並去惡血。以其有散濕破血之效也。散濕可以行氣。破血而行氣。可以墮胎。直指方治天弔驚風。以其能散血而破結氣也。用時去頭足。炙研爲末。以避其毒。

○萬金散 治小兒急驚

蜈蚣 丹砂 輕粉 乳汁

○定搐散 治小兒急驚定搐

蜈蚣 白附子 羌活 麻黃 殭蠶 代赭石 南星 蠹梢

薑黃 硃砂 荊芥 紫蘇

○五癩丹 治急驚爲癩

蜈蚣 南星 全蠍 防風 白附子 遠志 蘆薈 元胡索

辰砂 麝香 金銀箔 薄荷

第一方以蜈蚣破血散熱。丹砂輕粉乳汁。除痰下氣。驚生於熱而氣阻。故以辛溫散氣主治。而佐以下氣。氣通而熱散則驚定矣。第二方以蜈蚣破結散熱。白附子天南星去風痰。羌活麻黃散風濕。殭蠶硃砂薑黃代赭石除痰利氣。蝎尾治驚搐。荊芥破結。紫蘇散邪熱。氣阻則驚。故散結利氣可以治驚。小兒爲驚。大人爲風。驚與風均爲氣病。故治驚多用風藥。除痰破結。無非求其通阻也。第三方以蜈蚣破血散熱。南星白附子辰砂去風痰。全蠍治驚搐。防風驅風。麝香遠志利竅。蘆薈清疳熱積滯。元胡索調氣。金銀箔平肝降氣。薄

荷散結。驚爲全身病。癩係局部病。故有五癩之稱。驚轉爲癩。係由急而慢也。本方與治急驚者並無特異之處。雖曰治癩。等於治驚也。

### 蚯蚓

性味 鹹寒無毒

效用 主蛇痕去三蟲伏尸鬼疰蠱毒殺長蟲

說明 蚯蚓性味鹹寒。本經主治蟲病。有殺蟲化熱之效。別錄化爲水療傷寒。伏熱狂謬大腹黃疸。蚯蚓得鹽則化爲水。以寒能清熱。故能治伏熱大腹黃疸。爲濕熱病。蚯蚓有清熱利水之效。故可以治之。以硃砂爲丸。治小兒驚風。外治可以消腫。以其有散血退熱之效也。

○地龍湯 治瘀積太陽經中腰脊痛不可忍

地龍 肉桂 桃仁 羌活 獨活 甘草 黃耆 麻黃 蘇木



當歸梢

○活絡丹 治寒濕襲於經絡而痛肢體不能屈伸

川烏頭 地龍 南星 乳香 沒藥

第一方以地龍散血。蘇木當歸梢破血。桃仁去瘀。羌活獨活驅風散濕。麻黃黃耆散濕利氣。甘草治五內邪氣。肉桂散寒。瘀積而痛。故以散血破血為主。瘀之所以積滯。由於風濕所阻。故以驅風散濕為佐也。第二方以川烏頭驅風散濕。地龍沒藥散血。乳香活血。南星去風痰。寒濕襲於經絡則血阻氣滯而痛。故驅風散濕活血除痰。使濕散而通阻。則體能屈伸而止痛矣。

蛇蛻

性味 鹹甘平無毒

效用 主小兒百二十種驚癇癩疾瘰癧液弄舌搖頭寒熱腸痔蠱毒

說明 蛇蛻味鹹甘而性平。本經主治驚癇。以其能驅風而利氣也。驅風可以洩熱。瘕瘕與弄舌搖頭。均為熱結所致。故以洩熱主治。濕化為熱。則發為寒熱。驅風可以散濕。故能治寒熱。濕熱下注。則為腸痔。故散濕可以治腸痔。以其能殺蟲。故可以治蠱毒。時珍用以治喉風。退目翳。均取其驅風散濕之效。

○斷癇丹 治癇瘡後復作證候多端連綿不絕者

蜜炙黃耆 鈎藤鈎 細辛 炙甘草 蛇蛻 蟬蛻 牛黃 大棗

人參

○萬應蟬花散 治奇經客邪目病

蟬蛻 蛇蛻 川芎 防風 羌活 甘草 當歸 茯苓 赤芍  
石決明 蒼朮

第一方以黃耆益氣。鈎藤鈎蛇蛻蟬蛻驅風。細辛散結氣。牛黃除痰化熱。炙甘草大棗人參治五內邪氣。癇病復發。氣不和也。本方所用全為氣藥。使風

去濕散而氣和也。第二方以蟬蛻蛇蛻防風羌活驅風散濕。川芎當歸行氣活血。茯苓利濕。赤芍利氣。石決明散風熱。蒼朮燥濕。甘草和氣。氣阻則目病。故以散濕利氣爲治也。

### 斑蝥

性味 辛寒有毒

效用 主寒熱鬼疰蠱毒鼠瘻瘡疽蝕死肌破石癰

說明 斑蝥性味辛寒。本經主治寒熱。以辛能散寒。寒能清熱也。鬼疰蠱毒爲

蟲病。斑蝥可以殺蟲。鼠瘻瘡疽爲濕毒所化。斑蝥可以散濕攻毒。使毒從小

便出也。外證濕阻則爲死肌。斑蝥之毒可以蝕死肌。石癰爲濕熱閉結所致。

斑蝥可以破結而開閉也。斑蝥內服能破惡毒。外治能散積血。故癰疽之腫

硬無膿者。與蒜搗塗。可使破頭。若內服須與木通滑石燈心等利水藥同用。

否則毒從小便泄出時痛不可當也。

○太乙神明陷冰丸 治諸病破積聚心下支滿寒熱鬼疰長病效逆唾噫辟除衆惡逐邪氣胸中結氣咽喉閉塞有進有退繞臍絞痛惻惻隨上下按之跳手心中愠愠如有蟲狀毒疰相染甚至滅門

雄黃 當歸 丹砂 礬石 桂心 大黃 芫青 藜蘆 附子

人參 珍珠 麝香 鬼臼 犀角 牛黃 蜈蚣 射罔 烏頭

杏仁 蜥蜴 樗雞 地膽 斑蝥 巴豆

右方以雄黃丹砂礬石杏仁珍珠牛黃藜蘆除痰烏頭附子驅風鬼臼麝香射罔桂心殺蟲犀角斑蝥樗雞蜈蚣蜥蜴芫青散血破血大黃巴豆地膽蕩積破結當歸行血人參治五內邪氣本方治傳染病蟲入血中爲害最烈故以破血殺蟲爲主心下支滿寒熱效逆胸中結氣咽喉閉塞繞臍絞痛按之跳手心中愠愠皆病象也毒疰相染甚至滅門言其爲禍之烈而確知其爲

蟲病也。本方出於千金。我國在隋唐以前。已知傳染病之病源爲蟲。蟲入血則致人於死。故散血破血以殺血中之蟲。雖不如現代醫學之精密。而不涉絲毫迷信。與現在科學之治法。並無出入。可證國醫藥確有其立足點也。

### 蜣螂

性味 鹹寒有毒

效用 主小兒驚癇。瘦癯。腹脹。寒熱。大人癩疾。狂陽。

說明 蜣螂性味鹹寒。本經主治小兒驚癇。瘦癯。以鹹能制血。寒能清熱也。有消積之效。故能治腹脹。因積滯而發爲寒熱。故消積可以治寒熱。大人癩疾。狂陽。由於痰阻氣滯。制血可以利氣。消積可以除痰。故用以主治也。小兒疳積。去頭足炒過。和糖食之。爲病兒所喜。迨病愈則拒不欲食矣。

### ○龍膽湯 治小兒驚癇

龍膽湯 鈎藤皮 紫胡 黃芩 芍藥 茯苓 甘草 蜣螂  
大黃

○茵芋丸 治少小有風癩至長不除或遇天陰節變便發動食飲堅強  
亦發百脉攣縮行步不正言語不便服之不發

茵芋葉 鉛丹 秦朮 鈎藤皮 石膏 杜蘅 防葵 菖蒲  
黃芩 松蘿 蜣螂 甘草

第一方以龍膽草去肝經邪熱。鈎藤皮清熱除驚。柴胡利氣。黃芩清熱燥濕。  
芍藥燥濕利氣。茯苓利水。甘草治臟腑邪氣。蜣螂破血消積。大黃清熱導滯。  
驚癇爲熱極氣阻所致。故以清熱破血燥濕利氣主治。第二方以茵芋葉除  
五藏邪氣。鉛丹除熱下氣。秦朮除寒熱邪氣。鈎藤皮石膏清熱除驚。杜蘅下  
氣消痰。防葵驅風利氣。菖蒲除熱定喘。黃芩清熱燥濕。松蘿清熱平肝。蜣螂  
制血消積。甘草除五內邪氣。癩病由於氣血阻滯。故以利氣主治。氣和則脉

絡暢通行。動言語均無阻礙矣。

### 鼠婦

性味 酸温無毒

效用 主氣癢不得小便。婦人月閉血痕。癩瘡寒熱。利水道。墮胎。

說明 鼠婦性味酸温。日華主治氣癢不得小便。酸能收瀆利氣。温能散寒也。因濕阻寒滯而月閉。故收瀆散寒可以通閉。濕阻氣滯則成血痕。故收瀆可以破血。癩瘡由於氣阻。寒熱均為濕病。酸能收瀆利氣。温能化氣。故可以治癩瘡而療寒熱。因氣阻而水道不利。收瀆可以利氣。故能利水道。亦能墮胎。鼠婦生於潮濕之處。故用以治濕阻之病。可收破血利氣之效。千金治產婦尿秘。亦取其破血利氣之效也。

○驚甲煎丸 治瘧母

鱉甲 烏扇 黃芩 柴胡 鼠婦 乾姜 大黃 芍藥 桂枝  
 葶藶 石韋 厚樸 牡丹 瞿麥 紫葳 半夏 人參 蠱蟲  
 阿膠 蜂窠 赤硝 蜣螂 桃仁  
 右方以鱉甲鼠婦蠱蟲蜣螂桃仁紫葳破血散結。葶藶石韋瞿麥半夏烏扇  
 蜂窠除痰利水。大黃赤硝清熱導滯。柴胡牡丹芍藥厚樸桂枝散濕利氣。人  
 參阿膠益氣補血。乾姜溫中利氣。瘧母因寒濕阻滯。化爲濕毒而氣血俱病。  
 故以散血破結燥濕利氣。主治使濕毒疏散。正氣回復。本方中多爲峻藥。不  
 如此不能去濕毒而清血液也。

水蛭

性味 鹹苦平無毒

效用 主逐惡血瘀血月閉破血癥積聚無子利水道



說明 水蛭味鹹苦而性平。本經主逐惡血瘀血。以其能破血也。故能通月閉而破血癥積聚。月閉則無子。故通月閉可以治無子。濕阻則水道不利。苦能燥濕而破血。可以利氣。故能利水道。千金治漏血不止。因血阻而漏。故破血則可以通阻而止漏也。

○黃芩牡丹湯 治女人從小至大月經未嘗來。顏色萎黃。氣力衰少。飲食無味。

黃芩 牡丹 桃仁 瞿麥 川芎 芍藥 枳實 射干 海藻

大黃 蝨蟲 水蛭 蟻螬

○抵當湯 治婦人經水不利

水蛭 蝨蟲 桃仁 大黃

○大黃礞石湯 治經年月水不利。胞中有風冷所致。

大黃 牛膝 代赭石 礞石 丹皮 甘草 紫苑 桃仁 蝨蟲

水蛭 乾薑 細辛 芒硝 麻仁

第一方以黃芩牡丹桃仁芍藥蝨蟲水蛭蟻蝻破血逐瘀。大黃枳實清熱導滯。瞿麥射干海藻除痰利水。川芎行血開閉。從小月經不來。係由濕阻而血結。故以利水燥濕散血破結主治。使氣血通調。則月經自至矣。第二方以水蛭蝨蟲桃仁破血逐瘀。大黃清熱消積。本方治濕熱阻滯。經水不利。故以清熱破血爲主也。第三方以大黃芒硝礬硝蕩積滌垢。桃仁蝨蟲水蛭丹皮破血逐瘀。乾薑細辛祛寒散結。紫菀甘草散濕利氣。麻仁牛膝代赭石搜風逐寒。本方破血逐瘀之藥多。治胞中風冷之藥。僅乾薑細辛二味。可見風冷並非爲致病之源。而病源實爲濕阻而血結也。

雀甕

性味 甘平無毒

效用 主寒熱結氣壅毒鬼疰小兒驚癇

說明 雀甕性味甘平。本經主治寒熱結氣。以其能散結利氣而除寒熱也。壅毒鬼疰均為蟲病。雀甕能殺蟲。故用以主治小兒驚癇。由於氣阻。散結可以通阻。故能治驚癇。聖惠以雀甕取漿和乳汁。治撮口驚風。惟所用為甕中之蟲。可取蟲而舍甕。不能有甕而無蟲。故雀甕而指連蟲者也。

○白龍膏 治小兒癘風

雀甕 殭蠶 膩粉 薄荷汁

右方以雀甕散結利痰。殭蠶祛風化痰。膩粉通利大腸。薄荷驅風散熱。癘風係腸中氣結為患。故以散結利痰驅風導積主治。

衣魚

性味

鹹溫無毒

效用 主婦人疝瘕小便不利小兒中風項強背起摩之

說明 衣魚性味鹹溫。本經主治婦人疝瘕。以其能破結而利氣也。氣阻則小便不利。故破氣能利小便。中風爲氣阻所致。項強背起。摩之可以利氣而通阻。故能治小兒中風項強背起也。此爲外治之法。別錄療淋塗瘡。滅癥墮胎。以其能通阻。故可以療淋。以其能散濕利氣。故可以塗瘡滅癥。墮胎亦爲破結利氣之效也。

○滑石白魚散 治消渴小便不利小腹脹痛有瘀血

滑石 白魚 髮灰

右方以滑石白魚利小便。髮灰消瘀血。氣阻而水不能宣化。則口渴而小便不利。故以通阻主治。使氣通而能化也。小腹有瘀血而脹痛。故消去其瘀血。使之止痛。治法簡單。取效甚速。以三味藥皆有特效也。

# 何首烏

性味 苦澁微溫無毒

效用 主瘰癧消癰腫療頭面風瘡治五痔止心痛并治婦人產後及帶下諸

疾

說明 何首烏味苦澁而性微溫。開寶主治瘰癧消癰腫。以其燥濕散結也。頭面風瘡亦爲濕病。故燥濕可以驅風而療瘡。濕熱下注則成痔。濕阻氣滯則心痛。故燥濕可以治五痔而止心痛。婦人產後及帶下諸疾。均爲濕病。故以燥濕主治也。聖惠方治腸風臟毒下血不止。研末和米飲服之。斗門方治瘰癧結核。取根生嚼。而以葉搗塗。均能取效。足見其燥濕之力。張氏醫通謂今人治津血枯燥及大腸風秘。用鮮者數錢。煎服卽通。以其滋水之性最速。不及封藏。卽隨之而下洩也。不知何首烏爲燥濕之藥。安有津枯血燥而可用

燥藥之理。蓋其致燥之故。係屬濕阻不化。故燥濕可以通秘。若認爲滋水而得以通秘者。適與事實相反。苟不明此義。決不能用濕藥。亦決不能治濕病。

○何首烏丸 治婦人無子

何首烏 牛膝 大棗

○何首烏散 治白癩諸風筋骨疼痛偏身疥癬手足皸裂

何首烏 蔓荊子 石菖蒲 荊芥穗 甘菊花 枸杞子 苦參

威靈仙

○何首烏丸 治肺風面赤鼻赤

何首烏 防風 黑豆 荊芥 地骨皮 桑白皮 天仙籐 苦參

赤土

第一方以何首烏牛膝燥濕利氣。大棗治心腹邪氣。婦人無子。由於濕阻而氣不和。故燥濕可以通阻利氣而回復其生殖機能。若無子之原因並不屬

於濕阻者。不可以此治之。第二方以何首烏燥濕利氣。蔓荊子去筋骨間寒濕。石菖蒲威靈仙驅風散濕。利氣止痛。荊芥穗甘菊花清風熱。苦參清濕熱。枸杞子散濕利氣。風濕阻滯則筋骨疼痛。氣不運化則偏身疥癬。手足皸裂。故本方以驅風散濕主治。使濕散而氣和。則風去而痛止矣。惟藥極平和。恐難中病而奏效耳。第三方以何首烏燥濕。防風黑豆荊芥清頭面風熱。天仙籐行氣活血。地骨皮清骨節間熱。桑白皮清肺熱。苦參除濕熱。赤土搜濕。面赤鼻赤。爲氣阻熱結所致。燥濕可以利氣而散熱。以清熱爲佐。熱退而濕散。則氣和而赤去矣。

### 延胡索

性味 辛溫無毒

效用 主破血婦人月經不調腹中結塊崩中淋露產後諸血病血暈暴血衝

上因損下血。煮酒或酒磨服。

說明 延胡索性味辛溫。開寶主破血。婦人月經不調。以辛溫可以散結也。腹中結塊。係風阻所致。故以散結主治。崩中淋露。與產後血病。均為氣阻所致。氣阻則血積。而或崩或漏。或受阻而不通。辛溫可以散結而通阻。故能治崩中淋露。而療產後諸血病也。氣不能率血。則血逆而上衝。上盛則下虛。故日損下血。以辛溫散其在。上之血。則迫而下行。用酒為佐。以延胡索之力不足。以制逆行之血。故借酒力以為助也。延胡索為氣藥。雖能治血病。以力薄。不若治氣病之佳。好古治心氣腹痛有神。用得其當也。

○木檳湯 治產後因氣血不和而心痛

木香 檳榔 延胡索 金鈴子 三稜 莪朮 厚樸 桔梗

川芎 當歸 白芍 黃芩 甘草

○金鈴子散 治熱厥心痛。或作或止。久不愈者。



金鈴子 延胡索 酒

○手拈散 治好飲熱酒人中脘作痛

延胡索 五靈脂 草果仁 沒藥 酒

第一方以木香檳榔延胡索桔梗白芍燥濕利氣蓬朮三稜破血散結川芎當歸行氣活血金鈴子清肝熱厚樸燥濕黃芩清熱燥濕甘草治五臟邪氣產後氣血不和因濕阻而氣滯也故散濕利氣行血導滯使不和之氣悉歸於和則痛自止矣心痛言其痛之部位痛不在心也第二方以金鈴子清肝熱延胡索散濕利氣佐之以酒使行氣活血此爲肝熱而痛故制肝則氣平以延胡索及酒散其氣血則積滯通而痛不作矣第三方以延胡索散結利氣五靈脂破血順氣草果仁燥濕利痰沒藥散血止痛用酒以行氣活血其效尤捷此方凡因氣血阻滯而中脘作痛者皆可治之不僅對於好飲熱酒人有效也

肉豆蔻

性味 辛溫無毒

效用 主溫中消食止洩治積冷心腹脹痛霍亂中惡鬼氣冷症嘔沫冷氣小

兒乳霍

說明 肉豆蔻性味辛溫。開寶主溫中消食。辛能散氣。溫能逐寒。故能消食止洩。而治心腹脹痛。霍亂中惡。由於氣阻。散氣可以通阻。故用以主治。鬼氣冷症。嘔沫冷氣。小兒乳霍。均為寒阻氣滯所致。故以辛溫散氣。可治鬼氣冷症。嘔沫乳霍也。肉豆蔻為治脾之藥。脾喜燥而惡濕。燥則健運。濕則阻滯。辛溫能散脾濕。故能益脾止瀉。化濕消食。治氣之藥。用得其當。能頃刻見效。惟須識病而善用耳。

○豆蔻丸 治痘出氣虛吐利不止

肉豆蔻 木香 砂仁 龍骨 訶子肉 赤石脂 枯礬 神麩

○二神丸 治腎藏陽虛五更泄瀉

補骨脂 肉豆蔻

○四神丸 治腎虛肝氣逆滿不能消剋腹脹泄瀉

補骨脂 肉豆蔻 吳茱萸 木香

第一方以肉豆蔻木香砂仁訶子肉散濕利氣。龍骨赤石脂枯礬收瀆。神麩消積。是吐利不止。由於寒濕阻滯。故治以散濕收瀆之劑。使化濕而利氣。蓋其病源係屬濕阻而運化停止。故胸中所積水分。以吐利為惟一出路。吐利實係一種排水作用。苟不吐不利。更脹悶欲絕矣。所謂氣虛全與事實不符。但治法不誤。前人缺乏常識。誤認病源。為習見之事。不足異也。第二方以肉豆蔻補骨脂散寒逐濕。所謂陽虛。由於濕盛也。寒濕屬陰。陰盛則陽虛。實係腸中積濕不化。故以燥濕散寒主治。第三方以補骨脂肉豆蔻吳茱萸木香

散濕利氣以通逆滿。而止泄瀉。此爲寒濕阻滯而逆滿。與腎虛及肝氣並無關係也。

### 補骨脂

性味 辛大溫無毒

效用 主五勞七傷風虛冷骨髓傷敗腎冷精流及婦人血氣墮胎

說明 補骨脂性味辛溫。開寶主治五勞七傷。因濕阻氣滯所致。故以辛溫散氣可以治勞傷也。風虛冷爲寒積而氣阻也。溫能散寒。辛能散氣。故可以治風虛冷。氣爲濕阻則血不運行而骨髓傷敗。腎冷精流。故以散濕利氣主治婦人血氣不和。由於濕阻所致。故散濕可和婦人血氣。補骨脂爲氣藥。有利氣之效而無攻堅之力。決不致墮胎。若胎爲寒濕阻滯而失其調養。則利氣之後。或有墮胎可能。此非藥效。以貽失所養。雖不服藥亦墮也。李時珍用以

治腎泄。通命門。煖丹田。斂精神。蓋因寒濕阻滯而腎洩者。散以辛溫則寒去濕散而可以奏效也。若謂通命門煖丹田斂精神。則補骨脂無此力量。以走而不守。凡寒重氣滯之病均難奏效也。

○青娥丸 治腎虛腰與季脇痛

補骨脂 杜仲

○二至丸 治老人腎虛腰痛不可屈伸頭眩眼黑下體痿軟

附子 桂心 杜仲 補骨脂 鹿茸 麋茸

○補骨脂丸 治腰脚酸疼痛不止

補骨脂 牛膝 骨碎補 桂心 檳榔 安息香 胡桃 蜜

第一方以補骨脂杜仲溫散腎濕。腎虛係寒濕阻滯所致。故散以辛溫。可使行氣而止痛也。第二方以附子驅風散濕。桂心逐寒。杜仲補骨脂散腰腎之濕。鹿茸麋茸溫腎。以促其運化。所謂腎虛實係腎寒。腰酸不可屈伸。寒濕阻

滯而氣不運行也。故頭旋眼黑。而下部痿軟。上氣不能下達。下氣不能上行。乃有此證象。故以散濕利氣爲治。第三方以補骨脂散腰腎之寒濕。牛膝利濕。骨碎補驅風。桂心散寒。檳榔安息香利氣。胡桃與蜜潤燥。濕阻寒滯。故腰脚疼痛。化濕散寒可以止痛。其效在驅風而利氣也。

### 白豆蔻

性味 辛大溫無毒

效用 主積冷氣止吐逆反胃消穀下氣

說明 白豆蔻性味辛溫。開寶主積冷氣。以辛溫能逐寒而散氣也。氣和則吐逆可止。反胃可愈。穀食可消。而積氣可下矣。好古謂可以補肺氣。時珍謂可以治噎膈。皆化寒散濕之效也。惟氣藥僅能治氣病。若病不在氣者。用之足以傷氣而無補於病也。

○九味資生丸 治老人食難運化

人參 白朮 茯苓 炙甘草 橘紅 查肉 神麩 川連

白豆蔻

○神香散 治一切停痰胸脅脹悶疼痛等證諸藥不效者

丁香 白豆蔻

○木香丸 治食積心痛

白豆蔻 木香 丁香 三稜 蓬朮 青皮 陳皮 檳榔

巴豆肉 醋

第一方以人參益氣。白朮利濕。茯苓利水。炙甘草和中。橘紅散結利氣。查肉神麩消積。川連清熱燥濕。白豆蔻化寒利氣。老人有食積則痰濕不化而食不得消。故以消積利痰主治。第二方以丁香白豆蔻散寒化濕。消停痰而除脹悶。如為氣病則有效。所謂諸藥不效而用以主治者。當係純屬氣病。因誤

攻而痛故以辛溫散氣而愈也。第三方以白豆蔻丁香青氣中與消之香辛  
皮陳皮散結利氣。檳榔蓬朮三稜行氣破血。巴豆肉散寒消積。以醋煮之而  
減其暴。並以爲丸。酸收斂氣。使歸於和而止痛也。

### 縮砂仁

性味 辛溫 瀆無毒

效用 主虛勞冷瀉宿食不消赤白洩痢腹中虛痛下氣

說明 縮砂仁性味辛溫。開寶主治虛勞冷瀉。以辛能散氣。溫能散寒。故可化  
滯濕而治虛勞。止冷瀉而消宿食。寒阻而氣滯則爲赤白洩痢。腹中虛痛。故  
以辛溫散氣。可治痢而止痛。氣行則散。故曰下氣。縮砂仁辛香善竄。可將積  
滯之氣激之使通。故爲利氣之要藥。惟其功效全在以辛溫之力化氣中之  
濕。蓋濕阻則氣滯。濕化而氣通也。



○沉香降氣散 治一切氣滯胸膈不舒婦人經癸不調少腹刺痛

沉香 甘草 砂仁 香附

○大七香丸 治脾胃虛冷心膈噎塞漸成隔氣脾泄瀉痢反胃嘔吐

香附子 麥蘖 丁香 藿香 砂仁 官桂 甘草 陳皮 甘松

烏藥

○半夏茯苓湯 治妊娠脾胃虛弱飲食不化嘔吐不止

半夏 陳皮 砂仁 白茯苓 甘草 生薑 大棗 烏梅

第一方以沉香化氣。甘草和氣。砂仁行氣。香附散氣。氣滯則痛。以辛溫散氣。則氣和而痛自止矣。第二方以香附散氣。麥蘖消積。丁香溫胃。藿香快氣。砂仁散濕。官桂行氣。甘草和氣。陳皮烏藥散結利氣。甘松燥濕。脾胃虛冷。由於濕阻氣滯。故以辛溫散濕利氣。而佐以消積。使積去而氣化。則痢愈而嘔止矣。第三方以半夏止嘔。陳皮利氣。砂仁散濕。白茯苓利水。甘草和氣。生薑散

寒大棗和胃。烏梅斂氣。妊娠嘔吐。爲常有之事。以散濕利氣。主治與治濕阻而嘔者。並無差異也。

### 鬱金

性味 辛苦寒無毒

效用 主血積下氣生肌止血破惡血血淋尿血金瘡

說明 鬱金味辛苦而性寒。唐本主治血積下氣。以其能燥濕而散結也。濕阻則氣不化而肌不生。故散濕可以生肌。血阻而橫決。則散結可以通阻而止血。血積而不行。則散結可破積而行血。故既能止血。又能破惡血也。血淋尿血。均爲濕阻所致。辛能散濕。苦能燥濕。故能治血淋而止尿血。濕阻則金瘡不愈。故散濕燥濕可以療金瘡。鬱金爲治血之藥。其用在燥與散。凡氣鬱不舒之病。用以行血利散。定有殊功也。

○去滯止血湯 治失血初起

赤芍 丹皮 歸身 延胡索 鬱金 烏藥 黃芩 黑山梔

○平肝疏鬱湯 治肝陽不升氣阻爲患

柴胡 歸身 赤芍 川芎 香附 木香 鬱金 丹皮 金鈴子

○通經湯 治氣滯經阻

川芎 柴胡 當歸 赤芍 丹皮 香附 延胡索 佩蘭葉

鬱金 石決明

第一方以赤芍丹皮瀉血中積滯。歸身延胡索活血散氣。鬱金烏藥散血利氣。黃芩黑山梔清血熱。失血初起。散血中積滯則氣調血行而可以止血。故以散結利氣爲治也。第二方以柴胡香附木香散結利氣。歸身行氣活血。赤芍丹皮瀉血中積滯。川芎利氣。鬱金散血。金鈴子清肝熱。氣血阻滯致肝氣被抑。故以平肝利氣主治。使氣通而鬱散也。第三方以川芎利氣。柴胡散結。

當歸活血。赤芍丹皮瀉血中滯氣。香附延胡索鬱金佩蘭葉破氣散血。石決明散肝經積熱。經阻由於氣滯。故散濕利氣。破結行血。使通阻而行經也。

### 藿香

性味 辛微温無毒

效用 主風水毒腫去惡氣止霍亂心腹痛

說明 藿香性味辛温。別錄主治風水毒腫。以辛能散氣而使利水消腫也。氣積不化則爲惡氣。辛能散氣。故可去惡氣。氣阻而吐瀉爲霍亂。藿香辛温散氣。故能止霍亂。心腹氣阻則痛。故散結利氣可以止痛。蘇頌以藿香爲脾胃吐逆之要藥。元素助胃氣。開胃口。進飲食。以其能散惡氣。使脾胃安和也。

○藿葉湯 治胃寒嘔吐

藿香 人參 橘皮 半夏 生薑

○藿香正氣散 治四時不正之氣一切氣逆之證

藿香 紫蘇 陳皮 厚樸 半夏 白朮 茯苓 大腹皮 桔梗  
白芷 炙甘草 生薑 大棗

○排氣散 治霍亂氣逆食滯脹痛等證

陳皮 藿香 枳殼 香附 澤瀉 烏藥 木香 厚樸

第一方以藿香陳皮散結氣。半夏除痰。生薑散寒。人參益氣。胃寒則氣阻而嘔吐。此寒字不能作寒冷解。而其意為停滯不化也。故散結利氣。使停滯之氣得以運化。則寒散而嘔止矣。第二方以藿香陳皮桔梗生薑紫蘇行氣散結。茯苓半夏白朮大腹皮除痰利水。厚樸白芷燥濕利氣。炙甘草大棗治五臟邪氣。感不正之氣則氣逆。氣之所以逆。有水濕留滯於五臟也。故散濕利氣以安五臟。則逆氣散而正氣安矣。第三方以陳皮藿香枳殼木香香附散結利氣。厚樸燥濕。澤瀉利水。烏藥行氣和血。霍亂氣逆。食滯脹痛。因有濕阻

也。故散濕利氣。可以治霍亂而止脹痛。

### 前胡

性味 苦微寒無毒

效用 主痰滿胸脇中痞心腹結氣風頭痛去痰下氣治傷寒寒熱推陳致新

#### 明目益精

說明 前胡性味苦寒。別錄主治痰滿胸脇中痞。以燥濕可以利痰而除痞也。燥濕可以利氣。故能治心腹結氣。氣阻則風頭痛。散濕可以利氣而除風頭痛。傷寒寒熱為濕病。濕滯則寒。濕化則熱。故燥濕清熱可以治傷寒寒熱。能利氣而使氣化。故有推陳致新之效。收明目益精之功也。

○金沸草散 治肺惡風寒咳嗽聲重痰涎黃濁壅盛

- 金沸草
- 荆芥
- 前胡
- 赤茯苓
- 麻黃
- 半夏
- 細辛
- 甘草

生薑 大棗 烏梅

○前胡牡丹湯 治婦人盛實有熱在腹月經瘀閉不通及勞熱病後或因月經來得熱不通方

前胡 牡丹 元參 桃仁 黃芩 射干 旋覆花 栝萐根

甘草 芍藥 茯苓 大黃 枳實

○前胡湯 治寒熱嘔逆少氣心下堅聚膨脹不得食寒熱消渴

前胡 大黃 朴硝 滑石 茯苓 半夏 麥冬 石膏 栝萐根

黃芩 附子 當歸 芍藥 人參 甘草

第一方以金沸草前胡赤茯苓半夏除痰利水。荆芥散風熱。麻黃細辛散濕利氣。烏梅斂氣。生薑散結。甘草大棗和氣。咳嗽聲重痰涎黃濁。由於寒濕阻滯。肺氣不能運化。故散濕利氣。驅風逐寒。使氣和而痰化也。第二方以前胡牡丹元參黃芩栝萐根清熱燥濕。射干金沸草茯苓除痰利水。桃仁大黃枳

實清熱下瘀。芍藥燥濕利氣。甘草和氣。濕熱阻滯。月經瘀閉。故清熱燥濕。破瘀消積。使濕去熱清而經自通也。第三方以前胡清熱燥濕。大黃朴硝滑石清熱蕩積。茯苓半夏麥冬除痰利水。石膏栝蒌根黃芩清肺胃之熱。附子驅風散濕。當歸芍藥燥濕利氣。人參甘草和氣。寒熱嘔逆。因痰水阻滯。腸胃中並有實積也。故散濕利氣。佐以破堅蕩積。因消渴而以石膏滋胃液。因濕阻而以半夏麥冬除痰利水。非如此不足以止嘔逆也。

## 香附

性味 甘微寒無毒

效用 除胸中熱充皮毛久服令人益氣長鬚眉

說明 香附性味甘寒。故別錄除胸中熱。氣烈。故能充皮毛。久服令人益氣長鬚眉也。時珍用以解鬱消食。皆用其氣也。各家均謂其能益氣。以氣為濕阻。



則積聚脹滿鬱悶不舒。以辛香散其積濕。則氣行血暢。其病自除矣。故凡氣爲濕阻之證。以此治之。頗能奏效。但氣暢之後。不可再服。以濕去則氣和也。若散氣不已。則氣必化燥。濕阻則氣滯而病。濕盡則氣燥而亦病也。其治氣鬱崩漏痞滿等證。均爲別錄所不載。後人利用其氣。遂廣其用途。但濕之不在氣分者。未能奏效也。

○歸附丸 治氣亂經期或先或後

當歸 香附 醋 砂仁

○溫中丸 治食積肚痛

白朮 香附 針砂 山查肉 神麩 川芎 吳萸 蒼朮 苦參

醋

○七香丸 治鬱悶憂思或閃挫跌撲一切氣滯腰痛

丁香 香附 甘草 甘松 益智仁 莪朮 砂仁

第一方以當歸行氣活血。香附散濕利氣。以醋爲丸。可以斂氣。用砂仁湯下藥。能溫散氣中之寒濕也。氣亂則經不正。氣之所以亂。由於濕阻而氣滯也。故以散濕利氣爲治。此方可治輕微之病。稍重者不能治也。第二方以白朮蒼朮燥濕利氣。香附川芎散濕。針砂吳萸除血中積濕。苦參清熱燥濕。山查肉神麩消食。以醋爲丸。並以斂氣。食積腹痛。故用消積主治。而積之所生。則由於濕阻。是以散濕利氣。使能運化也。第三方以丁香香附甘松砂仁益智仁散濕利氣。以解鬱悶。莪朮破血散結。以治腰痛。甘草能排斥邪氣。使歸於和也。

### 紅花

性味 辛溫無毒

效用 主產後血運口噤腹內惡血不盡絞痛胎死腹中並酒煮服亦主蠱毒

說明 紅花性味辛溫。開寶主治產後血暈。以其辛溫散血也。氣阻則口噤。散血可以利氣。故能治口噤也。腹內惡血不盡則絞痛。紅花有散血而逐惡血之效。故能治絞痛也。胎死腹中。散血可以下死胎。酒煮服。以增行血之力也。中蠱毒則血結而氣滯。故散血可以治蠱毒。惟辛溫之劑。宜治寒濕阻滯之證。以辛能散濕。溫能逐寒。使血行而氣暢也。震亨多用破留血。少用養血。時珍曰。活血潤燥止痛。散腫通經。有積血散之則通。故曰破血。血滯行之則化。故曰養血。血滯行之則活。血阻散之則潤。氣阻則痛。散血可以行氣而止痛。濕阻則腫。行血可以通阻而退腫。善用多功。惟不可過劑耳。

○瑞金散 治月經不行血氣撮痛

薑黃 牡丹皮 蓬朮 紅花 當歸 赤芍藥 川芎 延胡索

官桂

○升陽舉經湯 治氣血俱脫經水不止

肉桂 白芍 紅花 細辛 人參 熟地 川芎 獨活 黑附子  
炙甘草 羌活 藁本 防風 白朮 當歸 黃耆 柴胡  
桃仁泥

○理濕驅風湯 治體肥中風先吐後瀉

蒼朮 南星 黃芩 黃柏 木通 茯苓 牛膝 紅花 厚樸  
甘草 升麻

第一方以當歸紅花利氣活血。薑黃蓬朮散血破結。牡丹皮赤芍藥清血導滯。川芎延胡索散結通阻。官桂散濕利氣。月經不行。血氣撮痛。因氣滯而血阻也。故散血以通阻。行氣以止痛。第二方以防風藁本羌活獨活黑附子白朮驅風散濕。當歸柴胡川芎白芍散濕利氣。紅花桃仁泥活血破瘀。肉桂細辛散結利氣。人參熟地炙甘草黃耆益氣補血。氣血俱脫。經水不止。係風濕阻滯而運化失調也。故驅風散濕以通其阻。活血破瘀以導其滯。益氣補血

以培其本。使氣和血行。則經水自止矣。此方標本兼治。補瀉並施。雖氣血俱脫。決可奏效。第三方以蒼朮南星除痰燥濕。黃芩黃柏燥濕清熱。木通茯苓利水。牛膝厚樸利濕。紅花活血。甘草和中。升麻驅風散鬱。先吐後瀉。而又中風病勢不輕。本方以清熱燥濕爲主。而以除痰利氣爲佐。能否對證。不可預必也。

### 金櫻子

性味 酸澇平無毒

效用 主脾洩下痢止小便利澇精氣

說明 金櫻子味酸澇而性平。蜀本草止脾洩下痢。止小便利澇精氣。均以濕盛脾失其節制則洩痢。腎失其節制則小便利而精滑。若在濕已就衰。氣散不斂之時。可以一斂而安。並無流弊。苟其勢方張。寒重濕盛。當以散寒利濕。

爲主。若誤用瀉藥。則寒濕阻滯。固結不解。痢不止而精益滑矣。致用瀉藥而不能明瞭其作用者。每多流弊也。

○九龍丹 治斲喪太過。敗精失道。滑泄不禁。

枸杞子 金櫻子 蓮鬚 蓮肉 芡實 山茱萸肉 當歸身

熟地黃 白茯苓

右方以枸杞子補腎。熟地黃散濕。金櫻子山茱萸蓮肉芡實瀉精。歛氣。白茯苓利濕。當歸身行血。利氣。敗精失道。滑洩不禁。非溫散不能奏功。本方以瀉精爲治。所瀉者必爲敗精。則不如聽其滑泄之爲愈也。

丁香

性味 辛溫無毒

效用 主溫脾胃。止霍亂。壅脹。風毒。諸腫。齒疔。蠱

說明 丁香性味辛溫。開寶主溫脾胃。以脾胃中有寒濕積滯。故以辛溫散寒逐濕也。寒阻則霍亂。辛溫可以散寒而通阻。故能止霍亂。濕阻而氣滯則壅脹。故散濕利氣可以治壅脹。氣阻化熱則爲風毒。濕阻不散則爲腫脹。辛能散濕利氣。溫能化寒。故能消風毒而退諸腫。口中濕阻則生齒疳。濕化爲毒則成蠱。故散濕可以治齒疳而除蠱。千金方治乾霍亂痛。以其能逐寒而散氣也。梅師方治婦人崩中。以其能散氣而止血也。其所治之病皆屬於寒滯。否則不可用也。

○木香散 治霍亂下痢氣脹飲食不消

木香 丁香 白朮 山查子 人參 橘紅 桂心 石菖蒲

良薑 草豆蔻 白豆蔻 炙甘草 木瓜 肉豆蔻

○五膈寬中散 治七情四氣傷於脾胃以致陰陽不和胸膈痞滿停痰

氣逆遂成五膈并治一切冷氣

白豆蔻 炙甘草 木香 厚樸 香附 丁香 砂仁 青皮

橘紅 生薑

第一方以木香丁香散濕利氣。白朮利濕。桂心散寒。草豆蔻肉豆蔻白豆蔻。橘紅散氣寬脹。人參益氣。石菖蒲除痰。良薑散寒。山查子消積。炙甘草和中。木瓜利脾伐肝。煎湯下藥。霍亂飲食不消。皆由氣阻所致。故以利氣爲主。而佐以除痰消積。使積去而氣和也。第二方以白豆蔻散氣。木香降氣。香附開鬱。厚樸燥濕。丁香散濕。砂仁醒脾。橘紅消痰。青皮疏肝。生薑散結。炙甘草和中。氣滯由於寒阻。故散寒可以通阻。本方所用均爲氣藥。以病源在氣滯不化也。

蜀椒

性味 辛溫有毒



效用 主邪氣效逆温中逐骨節皮膚死肌寒濕痺痛下氣

說明 蜀椒性味辛温本經主治邪氣效逆以辛能散氣温能逐寒也寒阻則温中可以散寒皮膚之死肌骨節間之寒濕均可以辛温之力使之宣化而疏散也氣阻成痺化熱則痛辛能散濕化之熱而可以下氣故能除痺痛也水由濕阻以辛温化濕則可以利水食由氣阻以辛温化氣則可以消食凡一切寒濕阻滯氣結不通之病蜀椒可以治之如圖快氣用以久服則辛散過度可以中毒本經久服輕身之說指寒濕積滯之人而言也

○蜀椒散 治濕痺達背

蜀椒 食茱萸 桂心 桔梗 烏頭 豉 酒

○防風湯 治風眩嘔逆水漿不下眩暈欲倒手足厥冷

防風 防己 附子 乾薑 甘草 蜀椒 桂心

○補心丸 治臟虛善恐如魘及婦人產後餘疾月經不調

當歸 防風 川芎 附子 芍藥 甘草 蜀椒 乾薑 細辛

桂心 半夏 厚樸 大黃 猪苓 茯苓 遠志

第一方以蜀椒食茱萸桂心散寒濕。桔梗散結氣。烏頭散風濕。豉和酒治風濕痺達背。言其氣阻之甚也。散寒逐濕。使氣歸於和則痺化矣。第二方以防風附子驅風。蜀椒桂心散濕。乾薑溫中。防己下氣。甘草和中。眩暈厥冷爲風。嘔逆爲濕阻。故驅風散濕。可以治嘔逆厥冷也。第三方以當歸川芎芍藥散濕利氣。附子防風驅風散濕。桂心乾薑逐寒。細辛蜀椒散濕利氣。半夏遠志除痰下氣。厚樸燥濕。猪苓茯苓利水。大黃清熱導滯。所謂臟虛實係寒濕病。以寒濕不化。氣血阻滯。致胸中有痰。胃中有水。腸中有積。精神變態。月經不調。故散濕利水。溫中導積。使氣化而血行。則經調而疾去矣。

### 沈香

性味 辛微溫無毒

效用 主風水毒腫去惡氣

說明 沈香性味辛溫。別錄主治風水毒腫。以其能散氣而利水也。氣聚不化則爲惡氣。辛能散氣。故能去惡氣。時珍治上熱下寒。氣逆喘急。大腸虛閉。小便氣淋。男子精冷。濕化則熱。濕滯則寒。上部已化而下部不化。則上熱下寒。故用辛溫下達之劑。以散上部之熱。下部之寒。痰水結塞則氣逆喘急。辛能散結。溫能化寒。氣阻既除。喘自可止。寒濕壅滯則大腸虛閉。故散寒逐濕。可以通閉也。小便氣淋。男子精冷。皆由寒濕阻滯所致。故以散濕利氣主治也。

○烏沈湯 治一切冷氣及婦人血氣攻擊心腹撮痛

台烏藥 沈香 人參 甘草 生薑 食鹽

○沈香降氣散 治一切氣滯胸膈不舒婦人經癸不調少腹刺痛

沈香 甘草 砂仁 香附 食鹽

○四磨湯 治一切氣塞痞閉胸悶不舒不時暴發

沈香 烏藥 檳榔 人參 食鹽

第一方以台烏藥散氣。沈香散寒濕。人參治心腹邪氣。生薑煎湯下藥。去寒散結。加食鹽以制血利氣也。氣血不和則心腹撮痛。故以散結利氣主治。第二方以沈香砂仁香附溫散氣中積滯之寒濕。和之以甘草。用鹽湯下藥。有制血降氣之效也。經癸不調。少腹刺痛。係氣阻所致。故散氣以通阻。使氣行而血調也。第三方以沈香散結氣。烏藥散血利氣。檳榔破氣。人參益氣。食鹽制血利氣。氣塞痞閉。以氣中挾濕而運化阻滯也。故散濕通阻。使氣歸於和。則不發矣。

### 烏藥

性味 辛溫無毒

效用 主中惡心腹痛。蠱毒宿食不消。天行疫瘴。膀胱腎間冷氣。攻衝背脊。婦

人血氣小兒腹中諸蟲

說明

烏藥性味辛溫。藏器主治中惡心腹痛。中惡則氣阻而心腹痛。辛溫可

以散氣。故可以主治。中蠱毒則氣結。故散氣可以殺蟲而治蠱毒。氣阻則宿食不消。故散氣可以消食。天行疫瘴。爲惡毒之氣。中人則病。辛溫可以散氣。故能治疫瘴。膀胱腎間冷氣。攻衝背脊。係積氣不散也。辛能散氣。溫能化寒。氣散寒化。則無攻衝之患矣。婦人氣阻則血滯。辛溫可以散氣而行血。烏藥有殺蟲之力。故能治小兒腹中諸蟲。濟急方治小兒慢驚。普濟方治血痢瀉血。經驗方治咽喉閉痛。集簡方治心腹氣痛。氣阻則驚。濕阻則痢。辛溫可以散濕而利氣。故能止痢而除驚。濕阻而氣滯則喉閉。血阻而氣滯則氣痛。故散濕可以利氣。散氣可以行血。喉閉可治而氣痛可止也。

○縮泉丸 治小便頻數

益智子 台烏藥 山藥 鹽

○烏藥順氣散 治暴中風氣攻注遍身麻痺語言蹇澀口眼喎斜喉中氣塞有痰聲者

麻黃 橘皮 烏藥 殭蠶 川芎 甘草 白芷 桔梗 乾薑  
枳殼 生薑 大棗

○小烏沈湯 治血氣不調心中刺痛

香附 甘草 烏藥 沈香 鹽

第一方以益智子散腎濕。烏藥散寒濕。山藥收瀆固腎。用以爲丸。鹽湯下藥。引之入腎。小便頻數。由於濕阻氣滯。散濕可以通阻。故能治小便頻數。第二方以麻黃燥濕利氣。橘皮散濕利氣。烏藥散氣。殭蠶化濕痰。川芎行氣散濕。甘草和氣。白芷散濕。桔梗枳殼散結利氣。乾薑散寒。生薑散結氣。大棗和胃。氣暴中風氣。由於痰阻氣滯所致。故以散氣利痰。去寒化濕。使通阻而氣和。

也。第三方以香附解鬱。甘草治五內邪氣。烏藥散積氣。沉香下氣。鹽制血利氣。因濕阻氣滯而血氣不調。故散濕利氣。以治刺痛。

### 琥珀

性味 甘平無毒

效用 主安五臟定魂魄殺精魅邪鬼消瘀血通五淋

說明 琥珀性味甘平。別錄主安五臟。定魂魄。殺精魅邪鬼。五臟有血積則不

安。魂魄因氣阻而不定。則精魅至而邪鬼作矣。琥珀有破血利氣之效。故能

安五臟。定魂魄。殺精魅邪鬼也。消瘀血。通五淋。均為破血利氣之效。藏器用

以止血生肌。合金瘡。以其能燥濕而散血也。元素用以清肺利小腸。以其能

散濕而利水也。琥珀有散血消積破結導滯之效。有實積者可用以通阻。如

屬氣閉不可用也。

○神效琥珀散 治石淋水道澀痛頻下沙石

琥珀 桂心 滑石 大黃 葵子 膩粉 木通 木香 磁石

燈心 葱白

○壽星丸 治因病驚憂涎留心胞精神不守謔言妄語不得安臥

生南星 琥珀 硃砂 生薑汁 石菖蒲 麵粉

第一方以琥珀燥濕散血。桂心破血利氣。滑石葵子木通瀉濕利水。大黃膩粉清熱導滯。木香利氣。磁石固精逐濕。燈心葱煎湯服藥。通氣利水。石淋爲濕熱積滯。氣結血阻所致。阻而不通則澀痛。結而不散則成塊若沙石。故以破血導積散結利水主治。使氣化而通阻也。第二方以生南星散風痰。琥珀通血滯。硃砂除氣阻。生薑汁和麵粉爲丸。平肝散結。石菖蒲煎湯下藥。驅風散濕。痰阻氣滯則神志不清而不得安臥。除痰利氣。驅風散濕。則氣血暢行。神志自清矣。



# 木瓜

性味 酸温無毒

效用 主濕痺脚氣霍亂大吐下轉筋不止

說明 木瓜性味酸温。別錄主濕痺脚氣。以酸能收瀉。温能化氣也。霍亂爲濕阻氣滯所致。收瀉化氣。則使歸於和而霍亂可止也。霍亂原爲吐下之病。治霍亂卽所以治大吐下也。轉筋亦爲霍亂之一種證象。氣血不能達於四肢所致也。收瀉可以利氣。而温以化氣。則氣和。故能治霍亂轉筋也。惟屬於寒濕阻滯者可以治之。若係真性霍亂。不能治也。木瓜之效。全在收瀉利氣。故肝爲濕阻者可用以制肝。但偶用則佳。常用則抑制過甚。必致鬱結不散也。

○木瓜湯 治霍亂吐瀉轉筋擾悶

木瓜 吳茱 茴香 甘草 生薑 紫蘇

○木瓜散 治脚氣

大腹皮 紫蘇 乾木瓜 炙甘草 木香 羌活

○檳榔散 治風濕脚氣疼痛疏通氣道

檳榔 陳皮 甘草 木瓜 香附子 紫蘇 生薑 葱白

第一方以木瓜收瀆利氣。甘草和氣。吳萸茴香散寒。生薑散結氣。紫蘇散血氣。此方治濕阻氣滯而吐瀉之輕病則佳。不能用以治重證也。第二方以大腹皮散濕利氣。紫蘇散血利氣。乾木瓜散脾濕。木香散氣中積濕。羌活驅風散濕。本方用以治氣中積濕則佳。治脚氣未必有特效。以普通散濕之藥。不能達於足部也。第三方以檳榔破結氣。陳皮散濕氣。甘草治五內邪氣。木瓜收瀆利氣。香附子散風止痛。紫蘇散血氣。生薑散結氣。葱白散寒氣。本方治氣之藥多。治濕之藥少。若氣中挾濕則用之有效。如濕重而至於疼痛。則決非疏通氣道可以止痛。以氣道雖通。而積濕仍無出路也。此種輕巧之方。十

九不能中病。雖爲近人所習用而誤事不淺也。

### 龍眼

性味 甘平無毒

效用 五臟邪氣安志厭食除蠱毒去三蟲

說明 龍眼性味甘平。別錄主五臟邪氣。以甘能和氣。氣和而邪息也。氣逆則志不安。食不化。故和氣可以安志而厭食。中蠱毒則氣阻。龍眼能和氣而通阻。故能除蠱毒殺三蟲。時珍用以開胃益脾。補虛長智。皆取其和氣之效也。甘能悅脾。故可以治脾虛。惟脾病純虛者少。挾濕者多。甘能助濕。故濕病誤用。每不能收補脾之效。而貽濕阻之患。如與燥濕藥同用。使引以入脾。大可化濕。惜知者不多也。

○歸脾湯 治心脾鬱結經癸不調

黃耆 人參 甘草 白朮 茯苓 酸棗仁 遠志肉 當歸身  
龍眼 木香 紅棗

右方以黃耆人參益氣。白朮茯苓利濕。酸棗仁遠志肉收瀆斂氣。當歸身行氣活血。龍眼補脾。木香利氣。生薑散結。紅棗健脾。心脾鬱結。經癸不調。由於脾濕不化。氣血受阻也。本方著重脾虛。而以助脾斂氣為主。雖有利濕之藥。不足以敵收斂之力。且人參雖能益氣。而其性則寒。大可助濕。故用於大熱之後。可以潤燥而益血。用於濕阻之時。則反足以助濕而益病也。此方雖出於濟生。以未能認清病源。詳審藥效。決不能副劑生之實。

### 山查

性味 酸冷無毒

效用 主化飲食消肉積癥瘕痞滿吞酸滯血痛脹

說明 山查性味酸冷。時珍主化飲食。消肉積癥瘕痞滿。以其能斂氣而導滯也。氣阻則水濕不化而吞酸。血不運行而脹痛。故收瀆可以利氣而治吞酸脹痛也。蘇頌曰。治腰痛有效。以濕阻則氣不和而痛。故收瀆可以利氣而止痛也。山查雖能消積。效力微薄。雖曰能消肉積癥瘕痞滿。輕淺者可用。堅實者無效也。後人不敢用猛藥。往往對於普通之藥。故神其說。若有絕大效力者。庸醫樂於卸責。遂用以敷衍。苟不改變方針。非但不能進步。終歸淘汰也。有識之士。當不河漢斯言。

○大中和飲 治飲食留滯泄瀉等證

陳皮 枳實 砂仁 山查 麥芽 厚樸 澤瀉

○四味阿魏丸 治肉積發熱

山查肉 連翹仁 黃連 阿魏

○立效散 治疝因食積作痛

○山查肉 川棟肉 藿香 枳實 蒼朮 香附 山梔 青皮

吳萸 生薑

第一方以陳皮砂仁麥芽散濕利氣。枳實山查消積。澤瀉厚樸利濕。飲食留滯。不至泄瀉。其所以泄瀉者。因有積濕。故散濕利濕爲主。而以消積爲佐。使濕化而積去。則瀉自止矣。第二方以山查肉阿魏消肉積。連翹仁黃連清濕熱。因濕阻則肉食不消。濕化爲熱則發熱。病源爲濕。故以清濕熱爲主。以消肉積爲佐也。第三方以山查消積。川棟肉山梔清熱。香附青皮散氣。枳實導滯。藿香蒼朮吳茱萸生薑散濕利氣。疝爲濕阻氣滯所致。雖無食積。亦可作痛。惟有食積則氣益不和。痛乃較劇耳。故本方以散濕利氣爲主。兼用消積之藥以導滯也。

豆豉

性味 苦寒無毒

效用 主傷寒頭痛寒熱瘴氣惡毒煩躁滿悶虛勞喘吸兩脚疼冷殺六畜胎  
子諸毒

說明 豆豉性味苦寒。別錄主治傷寒頭痛。以其能燥濕清熱也。濕滯爲寒。濕化則熱。故燥濕清熱可以治寒熱。瘴氣惡毒皆爲氣病。氣毒則化熱。故以清熱燥濕主治。濕阻則氣滯而煩躁滿悶。氣阻則喘吸。故以燥濕利氣主治。兩脚疼冷。氣不和也。燥濕可以和氣而治疼冷。中毒則氣阻。燥濕可以利氣而解毒。故能治六畜胎子諸毒。豆豉力量微薄。雖有燥濕清熱之效。當用之於吐下汗下之後。濕熱未清。方能中病。若未經吐下。濕盛熱熾。欲用以清熱燥濕。則決無效驗。而足以貽誤病機。願好用豆豉者。深體余言。則保可多功而無弊矣。

○梔子豉湯 治汗下不解虛邪留於膈上心下結痛虛煩懊憹不得眠

反覆顛倒臥起不安

梔子 香豉

○梔子甘草豉湯 治下後少氣

梔子 香豉 甘草

○梔子生薑豉湯 治下後嘔吐

梔子 生薑 香豉

第一方以梔子清殘餘之積熱。香豉清燥殘餘之濕熱。汗下不解。心下結痛。氣不和而濕熱未盡也。用過燥之藥。則不勝其燥。用過清之藥。則不勝其寒。而又非清不可。非燥不可。乃清之以梔子。而燥之以香豉。使恰到好處。第二方。梔子清熱。香豉清熱燥濕。甘草和氣。下後少氣。非氣不足。而氣爲濕阻也。濕已化熱而熱亦未清。故以梔子清殘餘之熱。香豉清燥殘餘之濕熱。以下後氣不和。而和之以甘草。第三方。以梔子清熱。生薑散結氣。香豉燥濕清熱。



下後嘔吐。濕阻而氣不和也。故以梔子清殘餘之熱。生薑散結氣。香豉燥殘餘之濕。本方用生薑以微偏於寒而薑能散結止嘔也。以上三方皆出傷寒論。用香豉梔子恰合病情。妙到極步。願今之用香豉梔子者。一審度之。弗徒重其名而不究其術也。

### 薄荷

性味 辛溫無毒

效用 主賊風傷寒發汗惡氣心腹脹滿霍亂宿食不消下氣

說明 薄荷性味辛溫。唐本草主治賊風。以辛能驅風也。辛溫能逐寒而散氣。故能治傷寒。濕阻氣滯則無汗。辛能散氣。溫能化濕。故能發汗。中惡則氣阻。而心腹脹滿。辛溫可以散氣。故能逐惡氣而治心腹脹滿。氣阻則霍亂。利氣可以通阻而治霍亂。運化停滯則宿食不消而氣不得下。以辛溫散氣。可以

回復運化。消宿食而下氣。薄荷之效在辛而能散。氣阻而熱。散氣可以泄熱。濕阻而寒。散濕可以逐寒。惟氣藥祇能治氣病。若寒實熱實之病。並不在氣者。不能以散氣主治也。

○消遙散 治肝氣抑鬱寒熱咳嗽月事不調

柴胡 白朮 茯苓 甘草 當歸 白芍 陳皮 薄荷葉 煨薑

○菊花茶調散 治頭風鼻塞或偏正頭痛

甘菊花 川芎 荆芥穗 羌活 白芷 甘草 防風 細辛

蟬殼 薄荷 白僵蠶 茶

○加味枳殼半夏湯 治上焦有熱咳嗽黃痰痞滿氣喘

枳殼 半夏 桔梗 茯苓 苦葶藶 防己 薄荷 紫蘇

馬兜鈴 桑皮 炙甘草 生薑

第一方以柴胡疏肝利氣。白朮茯苓利濕。甘草和氣。當歸行氣活血。白芍燥

濕利氣。陳皮薄荷葉散結利氣。煨薑散寒。濕阻氣滯則寒熱咳嗽。月事不調。故散濕通阻。使氣歸於和。則鬱散咳止。而月事自調矣。抑鬱雖由肝氣不和所致。而病源實在於濕。故以散濕主治。第二方以甘菊花防風驅風。白芷羌活散濕。荆芥穗蟬蛻薄荷散風熱。川芎細辛散結利氣。白殭蠶除風痰。甘草治五內邪氣。以清茶調服。去痰熱也。鼻塞頭痛為濕阻氣滯所致。故以散濕利氣主治。濕散則氣和而鼻塞可通。頭痛可愈也。第三方以半夏苦葶藶桑皮茯苓除痰利水。枳殼桔梗散結利氣。馬兜鈴散熱定喘。防己利濕下氣。紫蘇行氣散濕。生薑薄荷散結利氣。甘草和氣。上焦有熱。濕化熱也。痞滿氣喘。因胸中有積水也。故散濕利氣以通其阻。除痰利水以蕩其積。使水濕盡化。則咳止而喘停矣。

# 白芥子

性味 辛溫無毒

效用 主發汗胸膈痰冷上氣面目黃赤

說明 白芥子性味辛溫。別錄主發汗。以辛溫能散濕而利氣。因濕阻氣滯而無汗者。故散濕利氣可以發汗也。胸膈間有痰而爲寒濕所阻。不能運化則氣逆。故曰上氣。以辛溫散其寒濕。則痰化而氣行。故能治胸膈痰冷上氣也。濕阻而化熱則面目黃赤。故散濕利氣可以治面目黃赤。震亨曰。痰在脅下及皮裏膜外。非白芥子莫能達。古方控涎丹用白芥子。卽此義也。白芥子有散濕利氣之效。治寒濕阻滯之氣病。有豁痰開胃溫中止痛散濕消腫之效。若病不在氣者。不可用以主治也。

○控涎丹 治脅下痰積作痛

甘遂 大戟 白芥子

○解肝煎 治暴怒傷肝胸脅作痛

陳皮 半夏 厚樸 茯苓 蘇葉 芍藥 砂仁 生薑

白芥子

第一方以甘遂大戟除痰逐水。白芥子散濕利氣。痰積而氣阻則痛。甘遂大戟爲利水之猛藥。而性寒。濕在氣中。非溫不散。故用白芥子以逐寒散濕。否則除痰利水之後。氣不和也。第二方以陳皮蘇葉砂仁散濕利氣。半夏茯苓除痰利水。厚樸燥濕。芍藥燥濕利氣。生薑白芥子逐寒散結。怒則氣結。故胸脅作痛。所傷者不一定爲肝。故主治者皆爲氣藥。氣中挾濕則滯而不化。故燥濕利氣使化而能和。除痰利水。莫非通阻而利氣也。

香薷

性味 辛微溫無毒

效用 主霍亂腹痛吐下散水腫

說明 香薷性味辛溫別錄主治霍亂腹痛以寒阻而氣滯則痛而吐下辛以散氣溫以逐寒故能治霍亂腹痛吐下氣中積濕不散則腫辛溫能散濕利氣故可以散水腫惟其氣暴故用以治暑天之暴病散卒中之寒邪如霍亂轉筋脚氣水腫等證或為驟受寒涼或為濕阻不化致氣血滯運卒然病作以辛溫之力散其寒結通其氣阻則霍亂可治水腫可消以暴藥治暴病恰到好處也若病源較為複雜或潛伏已久者則非香薷所能治矣

○香薷飲 治傷暑腹中不和煩渴引飲

香薷 厚樸 扁豆 炙甘草

○十味香薷飲 治傷暑體倦神昏頭重吐利

香薷 人參 黃耆 白朮 茯苓 甘草 扁豆 陳皮 厚樸

木瓜

○六和湯 治傷暑霍亂煩悶喘嘔吐瀉

香薷 人參 茯苓 甘草 篇豆 厚樸 木瓜 杏仁 半夏

藿香 砂仁 生薑 大棗

第一方以香薷散濕利氣。厚樸燥濕。篇豆和中下氣。炙甘草和氣。傷暑則氣阻而濕滯。故腹中不和。濕化燥則煩渴引飲。故以散濕和中主治。使濕散而氣和也。此爲輕微之病。煩既微煩。渴亦微渴。且不能多飲。若大渴引飲。卽不能如此治法也。第二方以香薷散濕利氣。人參黃耆益氣。厚樸燥濕。白朮茯苓利濕。甘草和氣。篇豆和中下氣。陳皮散濕利氣。木瓜收瀼利氣。傷暑體倦爲濕病。吐利爲濕阻。故散濕利氣。卽可治體倦吐利。人參黃耆治氣虛。本方所治之病係濕阻。故此二味用得十分拙劣。第三方以香薷藿香散濕利氣。半夏茯苓杏仁除痰利水。厚樸燥濕。木瓜收瀼。砂仁散濕利氣。人參益氣。甘草和中。篇豆和中下氣。生薑散結。大棗和胃。喘嘔吐瀉。由於濕阻氣滯。故散濕利氣卽可止嘔吐。不必用人參也。

# 虎骨

性味 辛微熱無毒

效用 主邪惡氣殺鬼疰毒止驚悸治惡瘡鼠瘻頭骨尤良

說明 虎骨性味辛熱。別錄主邪惡氣殺鬼疰毒。以辛能散氣而殺蟲毒也。氣熱則驚悸。故以辛溫散氣可止驚悸。惡瘡鼠瘻均為濕毒所化。虎骨能散濕毒。故能治惡瘡鼠瘻也。虎骨有驅風散濕之效。故能追風定痛。聖惠方治歷節走痛。用頭骨炙黃。槌散浸酒服。別錄亦云頭骨尤良。可知頭骨之效勝於脛骨也。

○虎骨散 治腰跨重脚膝曉夜疼痛

虎骨 敗龜板 當歸 川萆薢 牛膝 川芎 肉桂 羌活 酒

○虎骨四筋丸 治肝腎虛寒而挾風濕足膝疼痛



木瓜 天麻 肉蓯蓉 牛膝 附子 虎骨

○酒浸牛膝丸 治脚氣筋骨無力

牛膝 附子 川椒 虎脛骨

第一方以虎骨驅風。敗龜板。川草薺。羌活散濕。牛膝利濕。引藥下行。當歸。川芎行氣活血。肉桂散腰膝寒濕。用酒服。使藥力透達病所。脚膝曉夜疼痛。爲腎中寒濕阻滯。氣血不能運行所致。故散濕利氣。使寒散濕化而止痛也。第二方以木瓜收瀋利氣。天麻附子虎骨驅風散濕。肉蓯蓉溫腎散濕。牛膝利濕。藥以酒浸。並和酒爲丸。腎爲濕阻。則氣化失調。而腰膝疼痛。故驅風散濕。以利腰膝。則痛自止矣。凡寒濕不化。名曰虛寒。以寒阻濕滯。缺乏生化之力也。若認爲空虛之虛。則謬以千里矣。第三方以附子虎脛骨驅風散濕。川椒散濕利氣。牛膝利濕。諸藥先用酒浸。以苦酒爲丸。脚氣因風濕阻滯。故筋骨無力。散濕利氣。使氣調血行。則力自生矣。

# 茴香

性味 辛平無毒

效用 主乾濕脚氣腎勞癩疔陰疼開胃下氣

說明 茴香性味辛平。大明主治乾濕脚氣。以辛能散濕而利氣也。腎爲寒濕阻滯則成腎勞。故以茴香散寒逐濕。可以治腎勞。癩疔陰痛。皆爲寒濕病。故散寒逐濕可以治癩疔陰疼。胃中有寒則胃氣不和。故辛溫散寒。可以開胃下氣。茴香走腎經。爲治疔氣之要藥。凡腎濕爲患者。用之有效。脚氣爲腎氣不化所致。故散腎濕可以治脚氣也。

○天台烏藥散 治疔痕小腹引控畢丸而痛

烏藥 木香 茴香 青皮 良薑 檳榔 川棟子

○香橘散 治畢丸偏墜

茴香 橘核 山查肉

第一方以烏藥散氣。檳榔破氣。木香青皮行氣散濕。良薑散寒。川棟子清熱利濕。茴香散腎中寒濕。以溫酒調服。使藥力易於透達。疝瘕因腎濕不化。氣阻而痛。故散濕利氣。使濕化而氣行。第二方以茴香散腎中寒濕。橘核降氣。山查肉收瀆利氣。畢丸偏墜。濕積而氣阻也。故散濕降氣。收濕利氣。使濕化而氣行。則畢丸回復其收縮之力而不致偏墜矣。

檳榔

性味 苦辛溫澀無毒

效用 主消穀逐水除痰瀦殺三蟲伏尸寸白

說明 檳榔味苦辛而性溫。別錄主消穀逐水。以苦能燥濕。辛能散結也。因氣阻而水穀不化。故燥濕散結可以消穀逐水也。濕阻氣滯則痰不化而成痰。

游故燥濕散氣可以除痰游。蟲生於濕。故燥濕可以殺蟲。伏尸寸白皆蟲類也。檳榔為破氣利水之藥。故甄權用以宣利五臟六腑壅滯。破胸中氣。下水腫。治心痛積聚。以燥而能散。故可破結氣而宣利五臟六腑壅滯。氣阻一通。則水腫自消。心痛自止。積聚自散矣。

○掃蟲煎 治諸蟲上攻胸腹作痛

青皮 炒茴香 吳萸 甘草 檳榔 烏藥 細梘子 硃砂

雄黃 烏梅

○截瘧飲 治久瘧不愈

常山 檳榔 丁香 烏梅

○開關利膈丸 治腸胃壅滯噎膈不通大便燥急

木香 檳榔 人參 當歸 藿香 甘草 枳實 大黃 厚樸

第一方以青皮茴香燥濕利氣。硃砂雄黃去風除痰。檳榔烏藥下氣破積。吳

黃甘草散邪逐濕。烏梅細榧子欽氣殺蟲。胸腹作痛。係屬蟲病。故以殺蟲為主。破氣散結。使蟲無盤踞之處也。第二方以常山劫痰截瘧。檳榔破氣通滯。丁香燥濕利氣。烏梅欽氣止瘧。常山治瘧。以涌吐風痰為主。瘧之不屬於痰病者。恐治之無效。不若柴胡鼈甲。能破血結氣滯之合理也。第三方以木香檳榔破結利氣。人參益氣。當歸活血。藿香快氣。甘草和氣。厚樸燥濕。大黃枳實清熱導滯。既經腸胃壅滯而噎膈不通。不應注重治氣。應注重通阻。大黃不協芒硝。攻下之力。甚為薄弱。人參在此方中亦並無用處。照脉按大可攻下。而用藥未能澈底。頗足誤人。

忍冬

性味

甘溫無毒

效用

主寒熱身腫。久服輕身。長年益壽。

說明 忍冬性味甘溫。別錄主治寒熱身腫。以其能散濕而消腫也。甄權謂其味辛。藏器謂其性寒。按之治效。當以辛寒爲近。否則不能解血毒而散風熱也。李時珍以昔人用以治風除脹解痢。後世用以消腫散毒治瘡。遂認爲古今之理。萬變不同。不知治風除脹解痢。係驅風散濕之效。既能除脹解痢。即可消腫散毒。實屬同一效用。並非別出新奇。乃昔人但知其治效。而不求其所以有效之故。是以對於每一藥品之效力。往往支離其說。使人捉摸不定。本書特注重此點。務使融會貫通。以除扞格之弊。俾讀是書者。對於藥效有確切之認識。

○防風當歸湯 治疔瘡發熱大便實者

金銀花 山慈姑 青木香 當歸 赤芍藥 白芷 防風 荆芥

連翹 升麻 羌活 獨活 甘草 大黃 薄荷 生地黃

○迴瘡金銀花散 治瘡瘍痛甚赤色變紫黑者

金銀花連枝葉 黃耆 甘草 酒

第一方以金銀花山慈姑當歸甘草散血解毒。青木香下氣消腫。赤芍藥連翹破血散結。白芷防風升麻羌活獨活薄荷荊芥驅風散濕。大黃生地黃清熱導滯。疔瘡發熱而大便實。以毒盛而熱結。故散熱解毒。並通其大便。以泄熱毒。第二方以金銀花散熱解毒。黃耆排膿止痛。甘草瀉火。以酒煮藥。行氣活血。外證血敗。故用黃耆以逐敗血而生新血。忍冬。卽金銀花。

### 馬兜鈴

性味 苦寒無毒

效用 主肺熱效嗽痰結喘促血痔瘻瘡

說明 馬兜鈴性味苦寒。開寶本草主肺熱效嗽。以苦能燥濕。寒能清熱。故用以治氣中之濕熱。肺受寒則效。受熱則亦效。有初爲寒繼爲熱者。以久效則

寒能化熱也。亦有熱效久而變寒者。以熱散而濕盛也。馬兜鈴用於化熱之時則可以清熱燥濕。而收化痰止喘之效。熱止即不可用。血痔瘻瘡均爲濕熱所化。馬兜鈴能清熱燥濕。故可以治之。惟不如治肺熱之佳。以肺熱爲氣病。痔瘻爲血病也。

○栝蒌湯 治久咳

栝蒌 瓢蛤粉炒 馬兜鈴炒 防己 葛根 杏仁 甘草 貝母

阿膠糯米炒

○阿膠散 治小兒肺虛肺疳咳嗽痰吐稠粘口乾作渴

明阿膠 炙甘草 馬兜鈴 糯米 杏仁 牛蒡子

第一方以栝蒌瓢清熱除痰。馬兜鈴清熱燥濕。防己利濕。葛根散濕利氣。杏仁貝母除痰。甘草阿膠和中益氣。此爲久咳化熱之證。故以清熱燥濕主治。第二方以阿膠糯米益氣潤肺。炙甘草和中。馬兜鈴清熱燥濕。杏仁瀉肺除



痰牛蒡子散風熱。痰吐稠粘。係濕阻而氣不化也。口乾作渴。濕化熱也。濕與熱均爲實病。並非肺虛。本方用阿膠糯米之意。在補肺。其實阿膠有散血利氣之效。眞虛者不能用也。

### 鈎藤

性味 甘微寒無毒

效用 主小兒寒熱十二驚癇

說明 鈎藤性味甘寒。別錄主治小兒寒熱驚癇。以甘能和氣。寒能清熱也。氣熱則驚。鈎藤既能清熱。亦能和氣。故能兼治寒熱。以寒與熱均由氣滯所致也。時珍主治大人頭旋目眩。平肝風。除心熱。以肝爲氣阻而熱。故用以清肝和氣。則頭旋可愈。而目眩可止也。平肝風除心熱。全爲甘寒之效。惟小兒氣弱而易病。故鈎藤之力足以治之。若大人肝病。則必係氣阻濕滯所致。迨濕

已化熱。既非微寒可清。又非甘味可和。如不用燥濕清熱疏肝利氣之藥。決難收效。故當以別錄爲準。時珍之說。不可從也。

○鈎藤散 治小兒天釣

人參 犀角 全蠍 天麻 甘草 鈎藤

○鈎藤飲 治小兒脾虛傷風身熱足冷欲成慢驚

鈎藤鈎 蟬蛻 防風 人參 麻黃 白殭蠶 天麻 蝎尾

川芎 甘草 麝香

○解肌散 治初中傷寒

人參 鈎藤 桔梗 甘草 川芎 葶藶 茯苓 杏仁 石膏煨

麻黃

第一方以人參甘草治五內邪氣。犀角散血。全蠍散風弛筋。天麻鈎藤驅風散熱。天釣爲熱結氣滯所致。故以散結利氣主治。散血原可利氣。惟是否血

結。當察其熱象而定。故犀角不可輕用。既至血結而用犀角。則散血之後。當清熱潤血。本方注重散血利氣。而並無清熱之藥。不無可商之處。第二方鈎藤鈎清熱和氣。蟬蛻防風天麻散風。麻黃散濕利氣。白殭蠶化濕利痰。蝎尾驅風弛筋。川芎行氣化濕。甘草人參治五內邪氣。麝香開關利竅。身熱足冷氣阻所致。故可成驚。惟脾虛二字。毫無着落。實係脾濕不化而致化熱。故以散濕利氣主治。欲成慢驚。是尙未成驚也。未成驚則竅必不閉。麝香用得太多。早照本方脉按。可用溫散主治。蝎尾麝香之類。皆用非其時也。第三方以麻黃散濕利氣。鈎藤和氣清熱。桔梗川芎散結氣。葶藶茯苓杏仁利水除痰。甘草和氣。石膏清胃熱。傷寒初起。如係水濕阻滯。氣促痰結。可以如此治法。否則萬不可用。且散名解肌。而病不在肌。石膏不煨。可清胃熱。煨之則無用也。